

南豐先生元豐類藁卷第二十

明進士巡按湖廣監察御史後學姑蘇王忬校刻

制詩

試中書舍人制誥三道

特進觀文殿大學士除節度使開府儀同三司

制門下錫之列壤顓師寵於蕃維申以榮名視官儀於
宰路所以褒隆舊摛優異宗工維今古之通規實邦家
之盛典宜兼禮秩屬在耆英播告治朝用揚乎彌具官
某莊毅足以任重肅哲足以視身有能斷大事之明有
克勤小物之慎以察微之智練達人情以經遠之謀彌
綸國體中外宣力左右納忠今方內靖嘉百揆攸叙助

朕致此時迺之庸位特次於上公職仍通於秘殿閱時
已久加命宜殊是用處以名城分建旄之寄屬均于台
衮極備物之恩榮於戲顯有功尊有德朕於崇獎近輔
之心可謂至矣親百姓撫四夷爾於將順朕志之義可
不懋哉尚體眷懷往祗厥服

中書舍人除翰林學士制

左右侍從之官皆朕所訪問以獻納為職者也惟禁林
任親地密於夫經營庶務進退大臣未嘗不預咨詢非
獨治翰墨典訓辭而已故待遇之寵不與他學士比其
重如此非智能材器拔出一時豈稱公選某純明脩潔
秉誼不回學有本原可以圖治體文有師法可以代予

言是用擢於右垣使就茲位今寰內嘉靖朝廷燕間朕
方明紀綱考制度以行之當世傳之將來夫能協爾衷
以輔朕志論思政理以著之謀猷潤色斯文以見於號
令待爾有當官之効以副予籲俊之心其往懋哉以承厥叙
勅監司考覈州縣治迹詔

朕惟天之所以視聽者在民故朕之所以承天者以吾
民事為尤重夫能使吾民足於衣食安於作息無愁怨
嘆苦之聲有廉耻自重之誼者在夫州縣之吏而已朕
既擇人付以茲任而尚憂夫方域之廣生齒之衆吏或
不明不良不能究宣恩德使達于下開導羣情使通于
上是以置使分部屬之刺督而考覈幽明甄別淑慝罕

能務稱其職朕方憲于先王以正百官之任使處其名必効其實夫比羣吏之治而謹其勸創固朕之所孜孜而不敢怠也廉按之臣其體朕意於夫治人之官審加察焉使純明循潔慈祥仁薦之吏無壅於上聞而昏庸汙慢苛薄媮偽之人不能自匿庶夫事舉刑清和樂交於內外風移俗易忠厚格於神明方虛朕心以觀汝効賞罰有典誼無敢私其尚欽承朕言不食

曾肇轉官除吏部郎中左選

勅具官某尚書政本失其分職之日久矣朕紀官以實而歸其常守故即選甚高銓綜之司典領尤重爾以學行材譖列職史遊宜進文階往祗厥叙朕方審覈幽明而公於黜陟尚思勉勵以敏事功可

劉奉世吏部員外郎制右選

勅具官某尚書政本失其分職之日久矣朕紀官以實而歸其常守即於選部任屬尤重以爾閱試惟舊為吏有方考擇於朝俾叅厥叙朕方審覈幽明而公於黜陟尚思勉勵以敏事功可

黃好謙戶部員外郎劉理戶部郎中制左曹

勅具官某田疇生齒之籍賦租課入之法即於省闈典領尤重邦之雋茂俾服厥官爾能敏於事功朕豈稽於信賞可

王陟臣馬琬戶部員外郎制右曹

勅具官某耕歛補助之法溝防通塞之政即於首闡典
領尤重邦之舊茂俾服厥官爾能敏於事功朕豈稽於
信賞可

劉摯禮部郎中制

勅具官某周書曰不惟其官惟其人則古今之正治官
得人固為急也儀曹之於即位考擇甚精爾以學行器
能策名儒館宜升階等往祗厥服朕方明於賞勸以待
羣吏之成爾尚懋于厥脩庶能康朕之事可

王子韶禮部員外郎制

勅具官某周書曰不惟其官惟其人則古今之正治官
得其人固為急也儀曹之於即位副貳所屬考擇其精

爾以博學多聞冊名儒館且升階等往祗厥服朕方明
於賞勸以待羣吏之成爾尚懋于厥脩庶能康朕之事
潘良器兵部員外郎制

勅具官某朕高即吏之選以進天下之材七兵之曹名
秩甚寵稽于有衆屬爾之能其尚懋于厥功朕方明於
賞勸可

胡援杜紘刑部郎中

勅具官某為郎居中時之妙選邦憲輕重典領惟艱朝
之雋良俾佐吾事天刑期于無刑此朕志也尚思明慎
以稱厥官可

范子奇工部郎中高遵惠員外郎制

勅具官某宮室城堽程匠度材之事即於隍部其選甚
高詢求在廷爾材惟允朕方董百工而康庶務爾尚勤
夙夜而能厥官可高遵惠改云副
或之選甚高

王祖道司封負外郎制

勅具官某封爵之恩施於內外所以親親尊賢國之典
也總領之任即選甚高明揚爾能俾踐厥位朕方正名
以稽郡吏之治而議其勸懲爾尚起哉以敏來効可

穆珣司封郎中制

封一
作動

勅具官某論功烈定勲級所以寵士大夫而勵其志也
主以即吏禮秩甚殊僉曰汝能宜正厥序夫正名者固
將考其實也尚有信賞待汝計功可

蔡京范珣考功負外郎制

勅具官某計羣吏之課而議其諫賞即於天臺任屬尤
重維時髦士宜服寵名使殿最允而功用興待汝能稱
其職可不勉哉可

陳向度支負外郎制

勅具官某財用多寡之教物產豐約之宜司度之曹典
貳為重爾惟幹敏宜服厥官夫能下寬齊民而上足經
費朕方勵精庶政之日爾尚悉其猷為可

晁端彥金部員外郎制

勅具官某財用金寶有出納之政權衡度量有制作之
法司環之任實典治焉僉曰爾材宜在茲位罔有陟明

之典待爾善於其官可

韓正彥倉部郎中制

勅具官某倉庾賦入之政祿廩調助之法臺郎典領列於右曹為官擇人爾往惟允夫能善於其職固將爾之勞可

趙令鑠祠部郎中制

勅具官某禮莫大於祭蓋事神者人道之極也祠曹所領體莫重焉爾惟精明宜服厥位其思任職以稱予奉天地宗廟兢兢之意焉可

徐禧御史中丞制

勅朕正名以定羣臣之位辨位以責庶務之實矧風憲

之官紀綱所屬曷可以不明其任哉具官其強敏仁篤學通古今擢典訓辭遂持邦法宜專分職以應新書是用撥自右垣仍其階品俾爾納忠宣力得壹意於中司以董齊百工而肅正內外庶余之作則更制罔或不虔在爾懋哉知其所守可

何洵直文及甫大常博士制

勅具官某奉常禮樂所出博士議論之官爾以藝文列於冊府宜升階品往祗厥叙夫能據經之說適今之宜不為曲學之阿爾尚篤於所守可

黃定太常博士制

勅具官某奉常禮樂所出博士議論之官爾以能聞朕

用分命夫能據經之說適今之宜不為曲學之阿爾尚
薦於所守可

趙君錫宗正丞制

勅具官某公室遠近之屬譜錄攷序之政主以列卿不
用他族蓋自漢始迄今循行丞於厥官參贊為重爾辭
學之敏列職書林宜進文階往祇厥服夫睦九族以刑
萬邦此朕志也爾尚懋于厥守庶以承朕之仁可

劉蒙御史臺主簿王子琦太常寺主簿制

勅具官某吏之有屬所以相成勾稽簿領之書交修官
守之事往從憲府尚懋爾勞可王子琦改憲
府作卿

徐鐸張崇程思邵剛太學博士制

勅具官某博士列於成均以講教為任爾以經明選用
往服厥官蓋尊其所聞以誘率學者汝之守也其尚起
哉可

林希著作佐郎制

勅具官某麟臺著作之貳即以詞學為之爾敏茂精明
久游書觀宜遷階品往服厥叙屬爾以文章之選其體
予獎遇之恩可

刑恕校書郎制

勅具官某典校秘藏之書旁求儒學之士尚思獎進之
意無忘砥礪之勤可

李常太常少卿制

勅具官某禮樂精微之致所以格上下而諸人神奉當
貳卿典領甚重爾聰明敏達久列書林宜進文階住就
茲位其務稱于厥職使節人心而和人聲者庶有得焉
非獨在於俯仰鏗鏘而已茲為朕志爾尚欽承可

錢暄光祿卿

勅具官某酒醴膳羞之具以供宗廟朝廷之用典領之
任位在列卿宜得其人俾服予采爾明習吏事勞閱有
聞選於僉言俾踐厥職尚其祗飭無曠爾司可

楊汲大理卿王袞韓晉卿少卿制

勅具官某叅理折獄之事主以列卿其選甚重爾練習
吏治閱試惟舊廷尉之選以卿改云是用屬汝尚思明

以稱朕恩可

陳睦鴻臚卿

勅具官某傳聲贊導之官所以賓接四方之使客位在
九列禮秩甚隆正名之初考擇惟慎爾以辭學材諳列
職史筵宜進文階往承厥序尚其祗飭以服朕恩可

廉正臣董誥司農少卿制

勅具官某田畝稼穡之政倉庾委積之事典領之任秩
亞列卿官儀之新考擇惟慎爾明習吏治勞閱有聞往
貳大農是惟高選尚其祗飭無曠厥司可

賈青太府少卿制

勅具官某九賦頒受之政百貨貿遷之法典領之任位

次列卿肇正官儀考擇惟慎爾明習吏事閱試惟舊往
共厥服汝惟克諧其體朕恩尚恩祇飭可

李立之范子淵都水使者制

勅具官某川澤河渠之政津梁舟楫之事置使典領禮
秩甚隆正名之初考擇惟慎爾明習吏治勞閱有聞選
於在廷俾踐厥職尚其祇飭無忘訓辭可

黃莘職方員外郎制

勅具官某四海九州之疆域山川風土之氣習載於圖
籍典以卽曹擢爾之材俾副厥位夫能使方圖遠近貫
利同而材用便在爾能知其守可不懋哉可

杜純大理正制

勅具官某折獄詳刑之事朕所慎也正於理官參贊為
重選於在列爾以材升聽察以情尚勤厥職可

李義內殿崇班制

勅具官某虞度營屯之事積累歲月之勤序朝位於殿
廷尚益思於奮勵可

元豐類藁卷第二十終

元豐類藁卷第二十一

明進士巡按湖廣監察御史後學姑蘇王忬校刻

制誥

左僕射門下侍郎王珪追封三代并妻制

曾祖永贈開府儀同三司

勅禮取其稱故位益尊則事其先者世益遠今予良弼
褒命其親得上至于三世求之於禮豈非取其稱哉其
官某曾祖某仁篤慈祥畜德甚盛蓋其為積也厚則其
流澤也廣故能開相厥裔為時宗臣百辟是師王室是
輔推功原大肇基自爾顯揚崇寵茲惟舊章是用進爾
之階秩在第一尚其不昧服此茂恩可

曾祖母尹氏追封燕國太夫人

勅優禮太臣厚其寵數所以勸在位之功德而共成天下之治也宰相之任重矣尊榮光大上施于其三世豈不即乎人情而稱其位序哉具官某曾祖母某氏幽閒靜專射蹈純德嬪于盛族壺彝是稱啓佑後人任國幾政流澤所自宜極褒崇追命定封列于大國光靈不泯尚服朕恩可

祖誓追封魏國公

勅天下之忠手上教有所自故上之仁乎下恩有所延其體相成治道所出惟吾股肱之佐共任天下之重愍書寵秩施其祖廟所以慰其顯親之心稱其事君之義具官某明允純篤德業惟茂義訓不倦彌遠益彰維時聞孫實輔予治念功原始宜極褒嘉庸建爾于上公俾受國于全魏歿而尚有知也其服朕之厚恩

祖母丘氏追封魏國太夫人

勅大其先之畜德也厚則其裔之蒙澤也長故寵祿在其子孫則褒榮施其祖彌翼功錄善必揆所繇所以勸天下之或其家也具官某祖母某氏身蹈純行嬪于令人教行閨門自隱而顯惟予哲輔實爾慈孫質厥所元宜有加命嘉一作全魏大國從夫之尊服此寵章尚綏爾後可

父準追封漢國公

勅朕敷求哲人以共大政隆名寵祿旣俾集于厥躬
大推崇則又施其禰廟所以遂吾大臣欲顯其親之志
而開示在位予一人尊獎近輔之心具官某父某材通
世用行蹈天常德畜不施澤流及遠惟時有子為國宗
臣叅聽萬機人望惟允慶所自出朕惟汝嘉屏蔽四方
漢為最大受茲封土承裕爾家可

母薛氏追封漢國太夫人

勅位有貴賤升降之等故禮有隆殺損益之差今輔予
聽斷萬機之臣在師長百官之任蓋列於廊廟名秩旣
殊故追榮其親命數亦異茲惟故事其可易哉具官某
母某氏婦道以順母儀以慈言為壺勸動應圖法能教

其子為時宗工股肱朕躬王室是賴褒崇之典旣啓名
誠漢惟大邦改進封號尚宜寵渥永祚厥家可

妻鄭氏追封楚國夫人

勅詩人之義君之夫人有委蛇之行河山之德然後在
尊位備盛服從其夫榮可以為稱施於世教所以始人
倫而出治道也具官某妻某氏淑茂柔明生于今族動
靜以禮協于經言相予宗臣慎其內行曾不借老求綏
厥家湯沐之田旣受方國有加迨寵宜易新封尚其光
靈服我休命可

中大夫尚書左丞蒲宗孟追封三代并進封妻制魯
曾祖顓士贈太子少保

敕朕稽于古以正百官惟尚書政本而左轄綱紀之司
延登哲人俾祗厥叙愍有加寵逮其重祖所以隆崇大
臣國之典也具官某曾祖某潛德西南在約彌勵流光
錫祚集其後昆總典中臺實輔予治東朝二品是用命
爾尚維幽漠服此茂恩可

曾祖母鮮于氏追封大寧郡太夫人

勅宗廟之數諸侯以五蓋任彌重者禮彌盛貴賤之節
然也今吾大臣追命及其三世與夫朝制豈異意哉具
官某曾祖母某氏作德於內以宜厥家啓相後人預蔽
國論按圖考地俾定爾封其尚有知服茲寵號可

祖伸贈太子少傅

勅人本手祖故吾加恩近輔褒榮其先至于累世豈不
緣人之情而制為命數哉具官某祖某內含純明外蹈
規矩流澤也遠有孫而賢進于中臺摠國綱轄善有所
自朕惟汝嘉東朝之孤傳位為寵用賁幽宅尚其欽承可
祖母陳氏追封蜀郡太夫人

勅世德之積者久則發於其後者長故朕隆崇近輔而
褒榮其先非一二世而止所以勸天下之善豈非博哉
具官某祖母某氏淑慎恭儉化行閨門啓其元孫持國
綱要蜀惟爾土以定新封尚其如存膺此茂渥可

繼祖母朱氏封閩中郡太夫人

勅夫位以德升禮以位叙不失其稱茲為義榮今吾崇

進大臣而圖其先列，為外命秩亦惟其宜，所以使上下之間公論，惟允具官某繼祖母某氏婉嫕冲靜行孚于家祚爾之孫興以輔朕西南上郡，愍有褒封，垂聲贊書，尚其不歿可。

父師道贈太子少師

勅吾之大臣，繇聰明材譖，以有爵祿之榮，予有命書，愍贈賁其考，廟所以稱其顯親之心，慰其霜露之感，位不次授，厥惟故常具官某父某忠薦純明德履，惟茂壯謀循政聲列在人，積厚慶隆及子而顯，時予左轄司國紀綱，惟流有原開跡自爾，宮師之貳名寵秩尊以告幽，尚其祗服可。

母陳氏追封潁川郡大夫人

勅人子之於其父母，莫不有顯揚褒大之心，惟任重秩尊得盡其志，此隆名寵祿所以勸天下也，且官某母某氏經德履善，宜其家室錫羨流祉在爾，後人時予宗工任國綱轄陪京望郡，俾定新封服我命書尚其不泯可。

妻陳氏封河東郡夫人

勅朕援用天下之材，以為共政之臣，就位之初，恩數禮秩所以尊榮光大之者，上施其祖禰而旁及於閨門，蓋任屬之者重則褒隆之者其可以不異哉，具官某妻某氏言容功德柔間懿恭，嬪于令人休有華問，惟時哲輔進秉國成相助之勤，爾効彌顯，改擇加郡，登崇號名尚

宜厥家永綏寵祿可

陸佃兼侍講蔡卞兼崇政殿說書制

勅朕於書無所不學於天下之事無所不攷而不敢自以為足故設置講解之官使以先王之六藝日陳于前朕於求多聞以建事之心可謂勤矣具官某好古知經宜在此位夫尊其所聞以懋厥職茲為爾守其尚起哉

可解蔡卞說講

徐禧給事中制

勅有殿內之臣職在於平奏述詳命令糾其違者而止之覆其是者而行之至於決獄官人條陳法式之事莫不當攷察焉其任可謂重矣具官某以財進拔興執邦

實是英宗藩邸舊名故制詰皆作寔

憲茲用推擇俾踐厥位惟精敏不懈可以周閱讀惟忠實不撓可以司論駁朕方觀爾之効爾尚慎於厥脩可

鍾浚將作少監制

勅具官某繕脩興造程工督作之任不可不屬之其人位視九卿禮秩甚寵正名之始考擇惟慎爾以材選往貳厥官尚其祇承以允收拔可

蔡燁河東運判制

勅具官某分部而使雖以將漕為名然實在於摠庶務之予奪察羣吏之能否參予任屬選授其艱以爾為能俾承厥序夫均通貨食使物有羨羸審覈幽明使人知勸畏茲為爾守其往懋哉可

供備庫副使董琰等十一人轉官制

勅具官某等西南之蠻恃阻且遠跳踉溪谷負詛于誅
王師鼓行舉其巢穴斬獲摧陷爾預奏功第賞有差尚
惟祇服可

待制王堯臣知單州制

勅提將之符顓制一道使紀律明於士衆忠實紀於朝
廷然後為國藩垣能稱其位具官某統治晉陽宜知其
任而西伐之卒比有逋亡繼形奏陳皆以疾告無宜繩
肅下之誼有浮言罔上之迹雖付之刺督考驗甚明而
既更詔恩法當管爾俾仍近職往守偏州尚自省循茲
為薄責可

鄧忠臣母周氏封縣太君制

勅具官某母某氏爾子忠臣有勞應賞願更寵典以啓
爾封俾錫命書茲為異數尚惟祇服以稱茂恩可

杜常兵部郎中制

勅具官某朕為保五之法寓戰陣之教欲使兵與農合
庶幾先王之迹夏官之屬實參典領以材擢爾往祇厥
序夫能獎誘服田之人悅趨講武之政馴致有漸而彌
綸不疏惟無廢爾之勤可以承朕之志可

李士京韓宗文大理寺主簿制

勅具官李士京等察治犴獄之官勾稽簿領之事往祇
選用無懈厥修可

許懋兩浙運副制

勅具官某朕擇遣使者分部而治雖以將漕為稱然寔
總民政之舉措察吏屬之能否蓋連數十城之地舉而
屬之其選豈不重哉爾詳練敏明宜服予采蓋爾之職
非止於督賦斂斷獄訟而已惟除苛熄擾可以使民遂
其宜惟務實去華可以使吏馴其行宣恩德而美風俗
待爾能善其官可不勉歟以祇朕命可

內殿承制段綽等知州制

勅具官某州有兵民之寄而地在疆場之間則常擇用
材武之臣屬之守禦之任爾以能選往祇厥服尚思綏
靖以稱簡求可

宗室承操新婦王氏進封國夫人制

勅親愛之而欲其貴富朕於公族皆推是心寵數徽章
施於閨壺茲惟故事朕敢忘哉具官某新婦某氏作合
宗藩躬有馴德啓茲全國用進爾封以致朕尊獎近屬
之恩尚懋爾服承休顯之稱可

宗室克懼復官制

勅具官某屬在近親享有榮祿以愆坐法亦既再期稽
于故常宜服位等勉思祗飭稱此茂恩可

李德明遙郡團練使制

勅具官某擐甲執兵人之重任賞信而速所以勸功爾
忠力武材稱于種落往殲醜類屢以捷聞圖爾之勞進

位二等益思奮勵以待異恩可

陳景等尚書省主事今史制

勅其中臺政本主曹事治文書亦不可不屬之其人爾往懋哉皆仍舊秩可

折克行彭保轉官制

勅具官某朕惟羗之猖狂內相賊虐致大之罰爰命六師開通道塗收復城聚摧堅獲醜爾功居多蓋夫軍賞之行速則衆勸是用進爾之秩以激士心尚有不次之恩以待非常之效可

程嗣恭祖無頗程博文開封府推官制

勅具官某開封天下之聚俗雜五方之民蓋巧偽繁興

獄訟滋出贊治之任攷擇維艱以爾為能俾祗厥服天慈惠足以煦養惇弱剛嚴足以帖伏姦強然導民之方尚有可識使風俗有以粹美而四方有以觀則往助爾長其尚懋哉可

李憲武勝軍節度觀察留後制

勅王師西出土大夫皆奮力行陣有尺寸之功者朕無不錄况議勞數實有大於此者其於信賞朕敢忘哉具官某比自臨兆率衆躬將摧媿醜虜恢復故疆鼓行羗中屢以捷告皎按閔閱朕用寵嘉秘殿榮名便藩留務兼是茂渥以獎爾庸其往茂哉益思來効可

李靖臣王存趙彥若曾肇轉官制

勅惟朕祖考成功盛德覆被天下固非文字可得而

名然史記冊書國家之典上以紀先帝言動之迹下以
及羣臣善惡之實傳之萬世宜有論次具官某以文學
選用與成信書朕惟汝嘉是用褒進尚其祗服以稱朕恩
李舜舉等轉官制

勅具官某朕惟先帝功德之殊宜見之方冊故詔擇儒
臣屬之論議而爾於其宮次與有祗事之勤亦既書成
例當褒錄進升位等其尚欽承可

皇伯滕王第十六女封縣主制

勅具官某第十六女親在近屬生而懿柔宜開縣甸之
封以榮湯沐之號予惟惇序爾尚欽承可
元豐類藁卷第二十一終

元豐類藁卷第二十二

明進士巡按湖廣監察御史後學姑蘇王忬校刻

制誥

吳居厚京東轉運副使呂孝廉轉運判官制

勅具官某朕進拔能吏以督視一路蓋州縣政令之舉
措公私貨食之歛散莫不任焉得人之難攷擇惟慎以
爾幹敏閱試惟舊用是分茲東部屬以使事夫施於民
者厚而刑罰清求於民者約而財用贍使德流澤通而
風化輯穆以稱朕憂憫元元而勵精庶務之意爾其勉
矣往服訓辭可

西頭供奉官武遂等轉官制

勅具官某王師西出以討不庭爾能殲擊兇殘恢復州
聚錄功增位不以次遷勉服朕恩益奮勵可

曲珍四廂都指揮使絳州防禦使制

勅具官某羗之獸心內相危害王師簿伐益將天威爾
能躬將士徒摧堅殪敵斬捕甚衆鼓行無前周衛典軍
之官名城禦侮之寄兼是寵數以疇爾庸尚有異恩待
爾來效可

文思使張俊等遷官制

勅具官某朕爰命六師奉辭西伐爾能效其忠勇深入
羗中獲醜摧堅以捷來上躡陞位等以懋爾勞其能繼
於前功朕豈稽於信賞可

爰小案誤受

文及甫吏部員外郎制

勅具官某朕正百工之名而將責其寔効其官吏考擇
尤慎天官之屬僉曰汝能其往欽哉無忘勉勵可

許安世都官員外郎制

勅具官某徒隸傭役之人典其廢置而時其迁序主以
卽吏其選其高爾蚤以敏明升華儒館宜增階等往涖
厥職尚思勉懋以稱簡求可

皇伯宗諤贈太尉韓王制

勅王者之於天屬覆之以光榮而恤其死喪之戚所以
本人倫教天下也具官某以德則循理小心始終無悔
以功則受命仁祖趣定儲極以位則渠門赤舄任兼相

將以爵則躡於五等列為真王以親則先帝之從父兄而余曰伯父顯名美實福祿之全可謂盛矣奄遘痼疾至於不起余聞震悼臨奠致哀再不御朝以伸情禮是用追加書贊進秩上公啓此大邦隆崇號稱余於親親之恩可謂備矣尚惟不昧服此寵章可

齊宗壽三班借職制

勅某有司言爾滿歲當廷而獎進爾勞又當躡等是用加茲寵渥列於命秩往惟祗服以稱甄收可

交州進奉使副梁用律洛苑副使阮倍太常博士制

勅具官某策名蕃服納貢王庭將事之勤朕用甄錄進其位等茲惟舊章往稱茂恩毋忘祗恪可

進其字本作在尔

皇伯宗惠新婦郭氏進封郡夫人制

勅具官某新婦某氏司宗於屬為近於位為重王於爵為貴蓋禮秩之見於外者既寵則施於內者宜殊爾德性淑均稱其家室爰加象服之盛以大鵲巢之榮其尚欽承茲為異數可

賈昌衡知鄧州

勅記舊俗者稱南陽之民夸奢上氣力難制御今其餘習殆尚有存者故有邦之任朕不輕以屬人具官某中外踐更令聞惟舊茲用攷擇往分彼土蓋穰澗之間雖俗雜難治然教民敦本興於好善召信臣杜詩之遺跡在焉使農桑勸而風俗厚爾尚思繼于前人其往懋哉

見小本作恩

小宋無俗字

無替朕命可

李良輔知廬州張崱陝州崔度蔡州王說徐州制

勅具官某朕董正治官自朝廷始至於六服羣吏莫不考循其名以督課其寔夫宣恩德以逮下厚風俗以承上其選為重者非長民之任乎爾惟其人屬以茲位蓋奉職遵禮以有循良之稱苟能自勉則寵勞錄最以明國家之典朕敢忘哉往欽厥司方稽爾效可

知泉州陳偁梓州吳幾復湖州唐淑問並任制

勅具官某吏之奉職循理能附其民使之久於其官則上下相安而治化易治今爾之材宜於既試俾仍舊服以懋厥庸尚體朕恩益思遠効可

吳安特太僕少卿制

勅具官某車府廐馬牧監之政典以卿士其選甚高念非得人曷贊其治爾材質明茂嘗更器使以憂去位既終喪紀宜更階等往貳厥官其勤夙宵以敏功寔可

菊囊二右班殿直制

勅具官某夷獠背恩賊殺命吏爾能擊刺醜類獻其首級宜陞位序以獎爾勞尚勵壯圖益思來効可

馮正符借職制

勅某西南夷背德獸心敢闕邊隙爾能通宣兩誼協助軍謀宜進官榮厲之守護勉思奮勵無替前功可

奉議郎景思誼授東上閣門使鄜延第一副將制

考小宋作方

字本增改

小宋無易字

勅具官某西討之兵有陳戰之功者朕無不錄爾能致其材武奮擊黠羗克敵摧鋒屢以捷報疇庸較實宜有異恩介上閣之使名貳連營之將領茲為獎拔蓋匪常科尚勵壯謀益思來効可

皇太后親姪高公繪通州刺史高公純達州刺史制

勅具官某等朕有顯親之心欲形於天下故加恩母黨所以本人情隆世教也爾等皆於外家寔在近屬持身恭慎朕所識察刺臨州郡典視祠宮秩寵地優並應拔用尚勵爾欽承之志以稱余廣愛之仁可

梅福封壽春真人制

勅某在漢之除數以孤遠極言天下之事其志壯哉晚

而家居讀書養性卒遺俗言世傳為仙今大江之西寔存廟像禱祠輒應能澤吾民有司上聞是用錫茲顯號光靈不泯其服朕恩可

卓順之直翰林醫官局等制

勅某稽其醫事而制其食先王之興也屬以愛主之疾爾能調治有瘳是用寵以官榮進其服品往遵厥職無替恪恭可

成卓閣門祗候制

勅具官某長川廣谷之間與蠻夷壤接爾處徼巡之任能練達人情輯寧疆候守邊之臣稱爾之材謂難代易是用進爾職於上閣而俾參其舊服朕於念勞獎善之

心可謂至矣其思綏靖以稱朕思可

溪氊本族副都軍主等制

勅某守邊之臣屬爾奉其方物來獻闕庭朕惟爾嘉是用命爾還其種落典治一軍往勵忠勤益思來効可

景青宜党令支團練使阿星刺史制

勅某爾有摧鋒克敵之功而又奉其方貢來見闕廷寔勇且忠法當甄進兵團之任以寵爾勞往其祗服益忠來効可

論氊巴柯族軍主結廝雞柯族副軍主制

勅某爾父有嚮慕中國之心歿而不遂其志屬爾于朕願備一官朕甚憐之是用加命爾秩往其祗服益勵忠

勤可

阿憐官捉廝雞並本族副軍主制

勅某爾父效貢來庭因得進見以爾為請願備一官朕嘉其尊嚮中國之勤是用錫爾命秩往思忠恪以稱朕

恩可
內一段作爾父因其種人入脩貢賤以爾為請

温高知欽州制

勅某州有兵民之寄而地在疆場之間則常擇用材武之臣屬之守禦之任爾以能進往祗厥服尚思綏靖以稱簡求可

劉安等中書省主事今史制

勅具官某等右省詔命之所出也吏治文書非習法今

熟成事不能稱其任爾等皆以命秩往抵乃服無忘恭恪以慎厥司可

知穎昌府韓維再任制

勅朕待天下之士未嘗不篤於恩况於故舊之臣朕所加厚則於順遂其意夫何愛哉具官某昔在宮朝事朕左右今列織秘殿位寵且親而使其故鄉屬以州在雖歲既再滿然重奪其志是用仍其舊服禪祇厥官以致朕求舊之仁尚勸爾在公之義可

米贊等轉官制

勅具官某爾以衆西出討擊羗虜斬獲首級有司以聞是用甄錄爾功躡陞位等往其勉矣益勵壯圖可

雍王顯乳母宋氏贈郡君制

勅某氏惟雍王顯於國屬之親且愛而爾有乳養之勤故其生也錫之爵邑其歿也飭以恩榮是用追命爾封進於列郡以光幽窆尚服寵章可

豐稷吏部員外郎制

勅具官某尚書正本而吏部天官所以綜叙羣材以成天下之治即於典領其選甚高是用擢爾之能俾參厥服朕方勵精政理而務在得人爾惟懋於其官庶幾承朕之志可

呂和卿考功員外郎制

勅具官某計羣吏之治而明黜陟之法臺即典領列於

左曹援用爾能俾參厥位夫能善於其職固將圖爾之
勞可

韓晉卿莫君陳刑部郎中制

勅具官某刑者所以助治而聖人之所尤慎中臺參綜
卽選甚高爾曉達吏方宜在茲任夫惟薦於明恕可以
副朕欽恤之心其往懋哉以祗厥叙可

范諤知密州范子諒濞州劉士彥泗州制

勅具官某守土之官民事所屬朕方勵精庶政之日尤
務在於得人攷擇於朝爾往惟允夫能宣布恩德以拊
循吾民而綱理風俗則為能稱其任爾其可不勉歟

東端翰林醫官制

勅某爾父易簡以醫入侍處劑湯液有勞可旌進遷爾
官用申獎寵往惟祗恪以稱朕恩可

沈士安西綾錦副使制

勅具官某明習禁方以醫入侍處劑湯液有勞可旌進
貳使名以申獎寵往承厥叙無替爾勤可

王蹊揚宗三班借職制

勅某爾等備吏屬治文書勤亦久矣是用從爾之請錫
之命秩往惟祗飾以稱朕恩可

王從伾知岢嵐軍制

勅具官某崇築壘培本以輯治軍旅及四方旣平而假
守之臣實任民事列於有土之官矧嵐谷並邊寄屬尤

慎再以選擇往祇朕命夫能開示恩威以惠養吾人而懷附異俗則為善於其職尚思爾守無替訓辭可

呂升卿館閣校勘通判鄆州制

勅具官某鄆有提封之廣生齒之衆於東為極郡贊貳政理選授惟艱爾蚤以藝文列於辭館宜更階品往承厥叙無忘祇慎服朕恩可

陳康民管勾永興等路常平張太寧提舉秦鳳等路常平制

勅具官某等朕為保伍之法寓耕戰之政典農之官屬以兼領蓋分路而治諭制或難固當從宜使之易地是用命爾換部而使夫能利田之民脩講武之令

各奮爾庸不失其職則為能體朕意其尚懋哉往遵迺服可

早行知無為軍制

御史有言責之臣朕之所取信也言而欲遂其忿閱之私乃至於失是非之當豈獨朕於取信失其所屬蓋汝之以言為職誼豈當然俾去憲臺兼榮職秩往臨軍壁宜體朕心

駙馬都尉王師約轉觀察制

朕於嫺戚之臣未嘗不篤於恩意然其積勤累善不罹罪悔而七歲一遷其官則必循用舊章蓋爵賞者天下之至公朕不敢以私撓法也具官某出于景族選上貴

主有淑慎之行無怠肆之失第其閔閱宜得叙陞廉按一州以為爾寵蓋爾自初仕迄此再增厥位皆以歲滿應於遷格則朕之謹于信賞爾之安其常守上下之際豈不兩義俱得哉無忘勉勵以求保於榮名可

崔象先等帶御器械制

勅具官某乘輿所在供御之物無一不備具者故鎧甲弓矢屬之以從者亦不去於側非左右親信惡足以任此哉爾給事惟舊宜就茲列益思祗恪以稱厥官

蔡京起居卽制

勅具官某王者言動必書豈獨思為後嗣法哉施之於已固欲擇語默慎行止也執簡肆筆必也屬之其人爾

之第下既已列於右史今復不次用爾使記予事位於左省士之在此選者希矣而爾之叔季址宜同升其於榮遇世罕及者朕恩若此則汝之自効宜如何哉其懋厥脩以報所受可

王中正種諤降官制

朕大興士衆屬汝等以伐羗固將舉其巢穴非徒卻虜收並塞之地而已兵西出則近而爾等東繇綏德回遼之路以疲士馬費芻粟致功用不集中正議既不審又約有分地當攻其左而不能棄擊以殲除醜類夫軍賞吾必信而罰亦安得已哉是用按爾之罪降秩有差其體寬恩尚思報稱可

封曹諭毋制

曹氏國之外屬而諭實爾之出諭既有列於朝亦有追榮及爾是以封之列郡秩以寵名茲為異恩以光幽壑

張知均州制

嶺之西南桂為劇部外有溪居海聚之民壤錯內屬拊巡填守詎可屬非其人爾比選于朝往備茲任而內不能統齊士吏外不能綏靖華夷致茲繹騷自于邦憲奪其美職處爾偏州茲惟朕恩無忘思省可

元豐類藁卷之二十二

元豐類藁卷第二十三

明進士巡按湖廣監察御史後學姑蘇王忬校刻

制誥擬詞

冊

惟宗祖宗集大命開蹟垂統傳繼在予賴天之靈海內和洽獲薦珪幣以為祭主惟先哲王享國君民必有儲兩以相承翼所以奉天地嚴宗廟與民為依長慮萬世也厥惟故典予敢不率咨爾某生材之卓絕倫拔類羣岐嶷成於自然緝熙光明不繇外獎潛德日茂敷聞下土將旄王組藩衛京師神示所毘戎夏係屬宜執七鬯位以時定今遣某某立爾為某夫天下之本在太子

太子之所務求諸已而已爾能明其心人不詔其孚爾能善其身人不戒其隨治亦多術矣要不易乎此也嗚呼匪得之難克之為難爾能服于訓辭以承我先后之流澤俾爾躬無疆惟休惟予及萬邦亦無疆惟慶豈不韙歟

王制一

音大漢之興鑿孤秦之故分土而開者九國當高祖之初同日而立者三王在孝武之世或支庶之疎屬或宗嫡之近親所以蕃輔京師承衛天子今朕按圖規地諏日定封推天性之厚恩本人倫之通誼以隆公室蓋率舊章某鍾氣至靈生材特異聰明先物不自於鐫磨孝

愛絕人非繇於獎勵比服公主之寵仍分將鉞之崇休有顯聞洽於時論是用疇其爵邕列以真王建爾國家保茲東夏視侵威於宰席增衍食於爰田用強盤石之基實重維城之勢嗚呼冊之宗廟申戒因其土風式是大邦親臨定其名號爾尚無作匪德以追配前人之休無從匪彛以咎揚皇祖之訓俾人預懷榮之慶而身兼燕譽之祥王其勉之朕命惟允

王制二

昔周建親戚蓋五十三國以蕃輔京師漢封骨肉或連數十城以承衛天子所以強形勢固根本計慮深矣朕甚慕焉矧先帝之子朕之仲弟宜膺顯冊進啓大邦茲

惟典常夫豈敢廢某淵靜冲約孝友忠篤不挾其貴以
從匪彛不恃朕恩以作匪德奉法遵職夙夜小心王子
雍邦滋久彌邵惟營丘之野臨淄之中太師呂尚之所
建國兼岱及海天下重地是用立爾保茲東土二公之
儀上將之節爰曰真食脩物寵章大告于廷咸以屬爾
於戲書稱帝堯之德曰以親九族詩美文王之聖曰刑
于兄弟蓋教自上行愛繇親始先王之道不易之理也
今予命爾不違茲誼尚悉爾心其勵相朕使黎民百姓
於變時雍繇家及國罔不作孚以屏予一人慎拊万夏
實諉在王時其勉之

王制三

天子支子若其母弟姬姓於周未有不侯劉氏於漢未
有不王蓋親之欲寵其位愛之欲厚其財先王之法人
事之理也某先帝少子朕之季弟聰明齊敏孝弟忠實
富而能約不從以敗禮賁而能戒不恣以好逸畜學樂
善厥德日新王曹積年遵職無懈惟斗牛之野太伯所
開三江五湖其陽大海鹽魚金穀天地之藏茲用命爾
式是南郊儀視三公任兼上將真封衍食備致寵章於
戲昔魯公於周大啓爾宇以輔王室康叔於衛實為益
侯以保人民今朕順稽于古以屬爾某爾尚念茲以祗
厥服常棣之澤配前聞人維城之休承我高后在爾勉
矣往其欽哉

皇子制

朕受天命撫萬邦實承祖宗之盛德丕烈永惟先王之典人君在位必蚤建太子所以重宗廟為天下萬世計也其粵初在母祥應先見誕始能言則岐則疑王封將位蕃輔京邑孝愛日裕溫恭自然神靈所開人望攸屬攷刺六藝主器以長生民之道不易之理也其立為某於戲非朕私于子某惟宋高后之傳序垂統朕不敢忽惟四方上下之所注心朕不敢距嘉與海內同孚于休播告遐邇其諭朕意

贈第八皇子制

朕惟父子之親人道之極蓋父有天下而隆名重位建

於其子此恩義之所始而先王之制不易之理也至於禮命未及奄遽淪亡申以哀榮朕何敢廢皇第八子某秀拔慧悟天質異甚不好戲豫安於靖恭謂及大成必為國器蕃輔王室朕有望焉而屬疾久之醫禱備至不幸夭闕痛何可堪其於陳迹尚存音容如接永言傷悼莫愬朕懷今有司上聞揆于公議謂宜秩以三事今于中臺爵之真王謚以佳號厥惟舊典朕豈能抑是用追錫備茲異數嗚呼生而有特出之姿不得遂其美歿而有非常之寵所以厚其終服我命書尚其不昧

王子制

朕隆於親親非特私恩而已所以教天下厚人倫也爾

家慶所鍾王室之出列於使領茲惟異寵往思報稱待
爾成人

韓琦制

躬閑廓之材體純一之德翊亮三后格于皇天惟初登
庸合志皇祖仁民愛物日陳上前進賢退奸陰利天下
側陋幽隱靖諧庸回削滅無類及受末命戡濟艱難以
已徇時坐定大議天望人事脗無間然市朝不驚按堵
如素海內萬里外薄四夷率職駿奔無敢先後昔三代
遭變繼世之初于戈警備陳及門廷書之史官以為後
法以至兩漢嗣位則又閉城屯兵以為故事未有兵藏
於庫士散於家而傳序繼統中外晏然如今日之成也
是繇列聖功德無窮之休亦惟廊廟之上遠畧大度身
任社稷克濟登茲者也

相制一

天有保命集于朕躬惟用乂民罔以自逸敷求良弼作
為憑依若園就規若正識墨今朕得士諗于在廷某廣
博靜淵密於世用推其計畫見於可行攷其事功效於
已試爾為爾守宜立輔朕茲用詔爾位于東臺嗚呼自
周衰以來千有餘歲先王之道蔽而不明振壞扶微朕
竊有志尚懋朕佐圖惟設施參諸經訓而不違質諸時
宜而不謬無崇小慧以易大猷無伐已能以距衆善惟
賞刑在上不可以僣惟聰明在下不可以拂俾厥后克

濟其任則爾身未孚于休其往起哉以承我祖宗之丕烈
相制一
有為之君舉賢以自助有志之士遇主而後伸兩常相
湏而相濟者少兩常相求而相值者寡朕觀前代君臣
之際聖賢相與之盛慨然忻慕願比迹焉今得其人詔
于爾衆某行無緇磷學有本原材諳智謀淑問惟舊約
忠左右匪懈夙宵蔽自朕心命爾予翼列予右相進貳
西臺嗚呼自道術不明而世蔽茲久法度多缺而紀綱
浸微圖治者以古為迂錯事者以苟為得兵安於坐食
而不合於農士習於空言而不知為吏禮義廉耻闕而
不思朋黨比周靡然成俗任之以學教而敗官以墨者

方興起之以赴功而便文自營者滋出伊欲黜漢唐之
淺陋追堯舜之高明尚懋相予予忱不貳使千載之隆
振於一朝上下之間配于前列以揚我先后之光訓亦
續爾舊服之顯庸

相制三

朕飭正三省綱理萬事號令所出本諸西臺閱審駁論
屬之黃閣推而達之則在會府以其官之長貳皆為任
政之臣鼎足居中各遵其職分守則異合謀惟一時予
俊又宜就茲列某身薦學行自幽而顯宣力中外績用
彌邵惟文昌政本揆叙百度介于左省考慎朕命圖濟
厥服爾其往哉朕訓迪治官順稽于古使其體至大而

統之有要其事至衆而舉之有條不惟其文惟其實不惟其位惟其人爾允念茲以勤予翼蓋先代之法存於籍者既殘缺而難循當今之宜殊於昔者又舛違而易遠酌是彛憲成之甚難尚迪庶工奉若惟新之則亦求來世預有無窮之聞

節相制

古者出軍之法始於一井之間遣將之常甫在六官之內師田共務文武同方蓋丁癸召之期則士就戎行而卿行於外已征誅之事則衆遵農畔而帥旋於朝歷世雖殊茲致惟一逮後王之更造開阡陌以居民隸伍符者身不受於一屨仗齊鉞者位不連於九棘其於荷戈

扞隊為王之爪牙立勳設旄為國之屏翰上下之任古今則同予得異能詔于在列某性資強教識慮精通束髮脩身有恕已及人之志歷官行事有丞流宣化之勤踐揚要極之司更閱歲時之久嘉謀黨論簡在朕心廣譽善聲治於輿論有國之典以爵詔功宜疇厥庸爰啟爾宇建大將之旗鼓尸我一方賜諸侯之士田保茲東夏以董齊於軍旅以撫和於士民叅帝傳之寵名益戶封之真食兼隆異數將獎勵茂勲於戲昔吉甫典兵萬邦為憲申伯作邑四國于蕃宜悉意於壯猷庶俾忠於前列答揚祖宗之訓予冀為衆得人夾輔邦家之基爾尚為時宣力

侍中制

舜用臯陶若股肱之承元首商咨傳說如舟楫之濟巨川蓋一躰之相成或兩求而莫值肆朕續極寤寐舊良果得異能屬之大任用揚乎號明論在廷某行蹈中和學通古今從容應物有適用之材曠慨立朝多據經之論比回朔於禁闥遂更踐於樞庭閱歲已深服勞惟舊朕惟紀官之敝又廢於正名分職之殊固難於覆實為司徒之定制俾位號之無虛乃眷宗工宜加異數東臺管轄之任爰處於弼諧南宮喉舌之司仍躋於端右體加隆之注意當益懋於壯猷於戲秉國之均天下之所取正熙帝之載朕心之所仰成使萬物各遂其生而一

夫無失其所以輔予治往惟汝諧

門下侍郎制

朕於天下之事以稟承處決屬之中書審閱駁正歸之門下而使尚書推而行之此三省所以異任而相成故長令僕射皆宰相之任而左右省侍郎所以貳之蓋謹其名者固將循之以稽其實也必使位無虛加人無虛受以脩國家之務然後稱朕意焉某明允修潔學通今古以風力之敏見於績用以志行之薦重於朝廷擢自從臣預國機政多引大體沃于朕心維董正治官之初介東臺管轄之寄歷選在列汝往惟允夫堅一心以在王室康萬事以亮天功汝之任也其尚勉哉

門下侍郎尚書左右丞制

尚書萬事所出丞所以筦其要門下三省之首侍郎所以貳其長朕稽于古義以正官彌故合是寵秩以命吾共政之臣非天下之材足以協朕之謀繫人之望者夫豈虛授某莊毅忠薦通于古今列於廟堂以義陪朕是用考擇以為選首使文昌左轄之任舉瑣闥叅議之効明六官紀綱上之所以齊下者無所撓四方奏列下之所以通上者無所壅以弼予一人而亮成庶績尚懋厥志無忘訓詞

給事中制

有事殿內之臣職在於平奏述詳命令駁其違者而正之覆其善者而行之至於決獄官人發驛遣使申冤滯察苛矯莫不總焉其任可謂煩且重矣朕董治正官之始思得其人以稱厥位以爾具官某忠薦強毅明於理體勞閱甚茂朕惟汝嘉列之東臺公議所屬惟精敏不懈可以統治要劇惟剛方不苟可以辨白是非爾尚慎于厥脩朕方觀汝之效

左右常侍即制

左右之臣以騎從乘輿職在獻納可謂親且重矣非器識操行屬乎朕心夫豈輕受某老于文學練達治體舊惟共政勤烈在時某直諒多聞薦於自守先帝遺朕調護有勞皆以耆名列于秘殿是用考擇於衆寵以茲任

朕惟爾之試用已効必能秉誼不渝惟爾之博通古今必能補朕之闕往祗厥服豈煩訓詞

左右諫議大夫制

諫議大夫堂議論舊矣今列于從官實有言責事無大小皆得開陳當其可從則為之更命令易取舍固朕之所虚心而聽也朕方於天下之忠讜惟恐不聞則居是任者直已以事上夫何問哉某器識強敏明于今古俾職獻替僉曰汝宜夫能通上下之情而使朕立於無蔽之地治道之所繇出在汝能任其任可不勉歟

二起居制

孔子稱言動以禮天下歸仁焉矧託于王公之上言而

為令動而為法故必有左右史從而記之所以照得失明勸戒能稱茲任蓋難其人其文學優深操行脩潔執簡簪筆有列於朝今朕順于古義以考定官儀是用正爾之名俾仍舊服其尚謹於書法以無曠于厥司

左右正言制

左右之臣以言為職事有得失關於理體利害繫於人情或方兆於幾微或已施於命令論皆可及詎無不從選用特殊寄屬惟重正官之始得士尤艱某綽有時材通於世用獻替之位宜服寵名夫上之求乎下者患乎難知下之求乎上者患乎難達使耳目之任無蔽藥石之規必聞尚惟汝能以助予治

經字後兩字本然以本
字為是

諫官制

某純明廣博信古知今用爾之長俾有言貴夫言人之
所難言爾無不盡而聞之如恐不及朕豈敢忘其尚懋
哉無或容而已矣

中書令制

虞氏之咨四岳惟亮天功周家之建六官以為民極朕
參于古義質以今宜以右省典正於鈞衡以中臺摠持
於綱紀兼是重任時惟宗臣播告在廷其聽新命某敏
于學術優有時材以經遠之謀彌綸治具以察微之智
練達事幾繇展采於禁林遂陞華於宰路協宣勞力積
有歲時朕惟授職以量能宜循名而責寔稽先王之作

采字本作宗

則以正百官起多士之赴功庶康萬務眷言舊德中以
異恩維化原寔繫於內樞俾首弼諧之任維政本一歸
於會府仍躋端揆之崇寵秩所加委成彌重豈獨儀刑
於列位固將叙正於彝倫於戲咸一德以格皇天輔予
于治釐百工而熙庶績待汝有為其務迪於壯猷尚思
齊於前哲體茲注意維往懋哉

門下中書侍郎尚書左右丞制

尚書中書門下三省本天下之務而侍中令僕射為宰
相之任舊矣自唐政不綱而失其守今朕董正治官使
三省之長皆復其任而於尚書左右丞左右省侍郎秩
有升降使貳吾任政之臣夫綱轄之地與御史更相察

小字本有居字

舉所以警官邪明憲度而侍郎於左右省無不統理則其所繫於體尤重非傑出之材不在茲選某官端方篤實學有本源預于政機人望惟允某強毅忠厚通于古今謀謨廟堂休有令聞是用命爾以為選首其尚體余所以處爾之重勿苟勿隨使百工庶尹皆知爾之私于法罔敢不正而政令之自上出者罔不得宜以稱朕所以作則垂法始今行後之意爾可勉矣予有望焉

中書舍人制

朕稽于古以正百官使循其名以效其寔惟舍人中書之屬以典掌命令為任而况列於侍從則又職在論思方朕明紀綱定憲度以為民極之初非能見於文章何

以究宣朕意非能通於世用何以彌綸庶務進在茲位不其重歟某官某忠正仁篤達于古今其文足以代王言其智足以謀治體斷自朕意以為選首其尚尊爾之學以善于訓詞奮爾之庸以裨于政理使爾能稱厥職而朕預於知人其惟勉哉以祗厥服

知制誥制一

典掌書令之任為左右之臣非獨在於潤色斯文而已固當論思治體以輔朕之不逮朕博考天下之材然後有所拔用則於付授豈不慎哉某強識敏學通于理要祗節勵行忠篤不回朕惟汝嘉使在茲選朕有兢兢業業一日二日萬幾之慮汝則思輔以謀猷忠於獻納朕

有作則垂憲施命以告四方之志汝則思達以文辭見於號令使汝為稱任則朕為得士豈不休哉尚其勉矣以服厥官

知制誥制二

贊為名命之臣法當得一作從非獨在於討論翰墨發揮詔號而已必將講明治具思獻其可以弼予違故非其人夫豈虛授某敏有時材優於學術擢於不次俾典訓詞維能守其所聞可以輔予不逮維能明於體要可以見於文章其尚懋哉方觀汝効

尚書左右丞制

本天下之政者尚書也本尚書之紀綱者左右丞也蓋衆職之治亂萬事之廢舉糾而正之實其任焉今朕董正治官使尚書續其舊服以僕射為任政之臣而六卿各遵其職至於綱轄之地所以驚官邪繩謬戾御史有不舉者得弁而治之則其繫於體尤重是以進其位叙使得貳吾任政之臣非望臨一時朕豈虛授某明允忠薦通于古今列于廟堂以義陪朕是用考擇以為選首其尚體予所以處爾之重勿苟勿隨俾百工庶尹知爾之不私于法罔敢不正稱朕所以作則垂憲始今行後之意爾可勉矣朕有望焉

左右司郎中制

尚書天下政本左右司紀綱之地故郎選異於諸曹非

器幹望實有聞於時莫稱其任某明敏強濟通於世用
宜在此位故以命汝創制之初舉墜興壞所以彌綸庶
務者待汝有為其尚懋哉以丞厥叙

元豐類藁卷之二十三終

康熙庚寅陽月假傳是樓
宋本校過焯記

元豐類藁卷之二十四

明進士巡按湖廣監察御史後學姑蘇王忬校刻

制誥

擬詞

吏部尚書制

尚書政本而吏部天官所以考擇人材以成天下之務
近世既失其職但受成事而已今朕既正官名且將歸
其屬任之法之始推行在人其於程能議功定勲頒爵
當率厥屬謹循科條非得周材曷稱茲位其忠厚仁篤
秉義守正列于侍從休有令名是用選而授之其務將
明使朕所以作則垂憲不獨於今可行方當施之後世
蓋汝有稱職之美則朕有知人之明尚其懋哉無替廢

吏部侍郎制

尚書本天下之務而吏部典掌選舉至於所屬之曹有行封爵議勲庸稽功課之事咸以咨焉近世以來職分於他司而位為虛器今朕董正治官使歸其名分豈虛為哉固將循之以求其實蓋明紀綱定制度以釐百工熙庶績此朕志也侍郎實二其長非獨當脩其官且將推明新制以行今而傳後則其選授豈不重哉某文學行義有聞於時列于從官猷納惟允是用命爾實首茲選其體予所以擇而使爾之意務祇厥服使政舉法行稱朕之意惟爾亦永有稱於後世可不勉歟

戶部尚書制

戶部之於中臺為周官司徒之職掌財賦之調度金穀之出入以待邦國之用歷唐五代征斂煩興而使名雜出地官之職蓋存虛號而已今朕正名以定羣臣之位辨位以責庶務之實尚書政本典領經費之司所屬尤重博求天下之士以宜其官某誠篤強敏智慮精密童煩治劇材力有餘民曹上卿無以易汝理材之術待汝有為今歲入甚廣而歲費所餘者無幾使官用有節而餘蓄可致公藏贍足而民賦可輕在爾能知其方庶幾承朕之志尚懋爾守以承厥叙

戶部侍郎制

田疇生齒之籍穀帛貨泉之計下以制民之產上以經

國之用地官之貳實參總焉朕方因能以用人正名以授職俾服予事必惟其材某頃以通敏之姿久更要劇之任往副民部孰如汝宜夫知農之艱難而有以勸助視財之豐匱而有以均節使公藏贍足而私蓄羨盈服將觀爾之能爾其無懈于位

禮部尚書制

昔舜命伯夷典禮后夔典樂至周弁為宗伯之官今禮部尚書蓋其任也威儀度數之詳聲音律呂之別莫不屬焉精微之至所以統和美人順遂萬物其體可謂大矣矧今典領實又考擇天下之材夫能無曠其官以充吾所以寄屬之意歷選在位今得其人某明允直清知經信道制作之事舊惟討論春官古卿是用授汝朕承百工之敝方欲作則垂憲以成一代之典使五禮之節同於天地八音之和格於祖考天下智謀材諧之士得而用之持汝能稱其官庶幾韓子于治無輔予位以副朕知

禮部侍郎制

夫禮之節文樂之和聲所以成三材而育萬物典掌之任秩亞春官朕方考正百工之名而大脩法度之政其於寄屬必惟其人某材出土倫學通經術宗伯之貳爾往欽哉其思先王制作之方而務知治民易俗之要其於理體非在於鍾鼓玉帛而已尚稱厥職以副予作則

垂憲之心可

兵部尚書制

中臺政事所出兵部司馬之任所以典摠師徒揚國威武至於按圖辨地駕乘庫兵司存之事莫不咨焉今朕考古以正官儀將使處其名者必效其實由是以推朕之志明紀綱成法度焉八座之貴夫豈輕以屬人某明達事幾好謀能斷列于侍從忠益居多夏官古卿是用顯授朕患今之兵不與農合故因保伍之法修閱試之令庶夫使民知兵近於古義夫究宣朕意使吏能奉承而民皆嚮勸以共武之服時汝稱職可不勉歟

兵部侍郎制

夫兵天下之備誰能去之自士不出於井地而將非六事之人歷世以來皆知古之宜法而患夫勢之難行朕獨慨然有志於是故修保伍之令明戰陣之教先王之跡庶或可幾經營之勤心亦至矣惟是夏卿之亞實參典領之司方正官儀尤慎推擇某材敏忠篤明習治體圻父之貳往惟汝諧夫能獎誘務農之民悅趨講武之政馴致有斬而彌綸不踈惟無廢爾之勤可以輔朕之志尚思自勉以服訓詞

刑部尚書制

昔舜命臯陶曰汝作士明于五刑以弼五教蓋刑者所以助治而非致治之本也其縱入輕重得失之際人之

舒慘繫焉此古之聖王所以未有不先慎罰也今朕悉心以正庶官之任而中臺八座典司邦禁選用之體得人惟艱某明允通博資以術學服采于位厥聲顯聞秋官古卿是用命汝蓋前世之治斲雕為樸破觚為圜而憲綱踈風俗美朕甚慕焉爾尚體朕之心析民以恕使辨訟自息而王政寔明可不勉歟以輔台德

刑部侍郎制

刑者所以禁人為非而聖王之所尤慎中臺摠領之任秩貳秋官之崇朕方正名以稽群吏之治而大脩制度之文必惟其人俾服予采某慈恕忠篤明習法令參執邦典莫如汝宜夫能使民無冤亦已善矣推之可以至於使民無訟爾尚勉哉以承予綱紀四方之志

工部尚書制

昔舜咨于衆疇若予工羣臣薦垂徃祗厥序蓋繕脩興造程衆藝飭五材國家務不可以不屬之其人今中臺起曹實踐其任矧屯田虞衡平水之職莫不隸焉正名之初其選尤重某材力強敏周于畫計更閱內外時稱汝能俾服冬官蔽自朕志夫詳明品式以訓匠建事使費省於國力寬於人至於墾地山林溝洫之政莫不畢舉皆汝守也其尚懋哉以率厥屬

工部侍郎制

夫飭五材程匠事國家之務所不可已也故共工之事

任屬非輕朕方若稽舊章財正官號思得智能之士以副采擇之詐某開達敏強明習典故冬官寵列俾介厥司考究制度之文紀綱脩繕之政在爾能舉其職以稱吾經理萬事之心其尚懋哉往祇厥服

禮部制

朕正郡司之名而責其寔歸天下之務而本之尚書故即選甚高維春官之屬禮樂所出宜得智謀材諧之士以脩厥官某業履望是見於世用考擇於衆莫如汝諧其尚體予董正治官之意於夫創制之初明紀綱興曠廢惟知其要乃能圖其詳惟悉心以祇厥服

主客制

朕甚重即吏之選欲以歛羣材責功寔典客之任列於門曹維時右人宜服茲寵國家之有賞典所以待汝有為

膳部制

牲豆酒膳辨其儀數而修其政春官之屬即秩甚寵詢求材實爾允僉言尚思欽承以稱推擇

駕部制

輿馬輦乘之奉郵驛圉牧之治中臺要務主以即曹敷求得人俾任吾事夫駟之頌養馬之詩也蓋其大旨曰思無邪然則為政之方斯可知矣能識於是夫何遠哉

庫部

甲盾弓矢之噐乘輿鹵簿之式武藏之任即選甚高得

士於朝屬任惟允夫稽功實以勸賞朕方必行悉忠力於事為爾尚無懈

都官制

係累春鑿之人恤其廩給而申其訴競主以即吏國之舊章爾惟惠茲宜蒞厥職尚思奮勵以稱東求

北部制

內外經費之事總於句考之司即實主之位重省闔爾惟明敏宜能厥官惟時懋哉以服予訓

司門制

門關筦鍵之事啓閉出入之節總其籍賦而審其禁令即官之任爾允詢求尚敏勞能朕將考察

屯田制

率屯戍之兵服畝畝之事所以益邊省饋佐國裕民即於中臺摠其政令用爾之敏宜能厥官往服寵名無忘奮勵

虞部制

蒐田有時而澤梁有禁虞衡之守所以遂羣生而參化育中臺典領咸屬汝材其思順鳥獸草木之宜以稱朕愛人及物之意

水部制

川瀆隄防宜其利而備其害四方萬里之遠即寔總領秩甚寵焉爾以周材朕用選授夫知水之不以障而導

之使行此成法也推而見之於事待爾能稱其官

御史中丞制

御史府持吾邦法所以糾官邪繩不恪輔予于治非秉
義純篤望寔敷于上下不稱其任某強毅肅括以提其
身博學精識通于世用是以考擇于衆寵以茲位夫有
守正向公之志又有能辨是非之明抗論於朝使賢不
肖忠邪不失其寔此法之所以為治具而能佐吾以善
養人之意使汝能宜其官則朕為得其所屬尚體予訓
其惟懋哉

知制誥授中司制

典掌明命摠持憲綱非博學有文強毅忠篤曷可以兼
斯任哉某志行清夷材資敏達更踐內外試用惟允論
思禁掖肅正朝端蔽自朕知拔於不次惟明於體要可
以見於訓辭惟公於是非可以施於刺督尚懋厥守方
觀爾能

中司授太中大夫制

朕正名以定百官之位辨位以責要務之實矧風憲之
臣紀綱所屬曷可以不明其任哉某強敏開遠行誼仁
篤學通古今擢典訓辭遂持邦法宜專分職以應新書
是用進爾之階品在第四俾爾納忠宣力得壹意於中
司以董齊衆工肅正內外庶余之作則更制罔或不虔
在爾懋哉知其所守

責御史制

中執法所以糾官邪繩不恪也其可以自為欺且急歟其按於疏遠之中服在此位宜殫忠力以稱所蒙而按劾大臣既非其實稽其分職則自餒焉朕為之優容俾從薄責而進對之際公肆誕謾屬吏推窮獄辭明具論其情則懷詐比其治則瘵官夫身任紀綱之司而抵冒若此雖朕欲貸汝而如公議何斥守偏州尚仍階品往新厥志庶前愆

御史遷卽官制

御史董攝紀綱肅正朝廷於政之有不當子理於臣之有不協于極皆得言之故吾甚重其選爾有列于此能勤厥職雖歲月未久而風望甚高今有司奏爾之課於法當遷吾不得留易之卽位使爾知自効能不擇官則吾於報功亦有異賞爾其勉矣無忘訓言

御史知雜制

臺無大夫中丞則御史之首當專夫庶務實摠邦憲朕選於衆然後屬之其人豈不重哉某敏茂直清通于學問輟自右史往踐厥司夫振舉紀綱以闡明法度糾繩廢慝以肅正臣工朕方虛心志在於與人為善爾能苦口無患於不得其言尚自強以允公論

監察御史制

御史持國紀綱所以糾官邪齊內外選衆而授厥惟難

哉爾好古知方強於自立刺察之任往其欽哉惟不回
于爾心以無撓于余法在知所守可不勉歟

元豐類藁卷第二十四終

元豐類藁卷之二十五

明進士巡按湖廣監察御史後學子姑蘇王忬校刻

制誥

秘書監制

帝王之治必有國籍之歲又擇當世聰明拔出之士聚
於其間使得漸磨文學之益獎成其材以待國家之用
故書省之設吾不計近功而要於廣畜德所以厚其禮
秩而艱於用人庶以明朕好古樂善之勤而勵學士大
夫之行也某多識博聞操守純薦諸儒所尚今問惟舊
延處茲位蔽自朕知夫尊其所聞而行之不倦使輔於
世教而其効可言非獨優游冊府而已在爾自強以承

朕志

著作卽制

麟臺著作之任卽以詞學為之必惟其人爾以材選惟能明於理要乃可見於文章其尚敏於厥脩朕方觀汝之効

秘書卽制

秘藏四部之圖籍卽所守也職清秩美必也屬之其人爾以材稱俾服茲選尚惟敏於畜德朕方觀汝之能

正字制

是正文字之官實為儒學之選宜躰育材之意勉思畜德之勤

殿中監制

分職殿內參侍左右監總六尚之官以供服御之事位視九列禮秩甚優正名之初考擇惟慎某明習吏治勞閱有聞選於在廷俾踐厥任往其祗飭無忘訓詞

殿中丞制

丞於殿內參總六尚之官而察其稽失出於公選首以材升尚務欽承方觀汝効

太常丞制

丞於奉常參摠禮樂之事祠祝之義惟學古知方乃能不失其守尚務祗飭以服官箴

衛尉卿制

典領宿衛之官地親責重位在九列禮秩甚隆考擇其人屬任惟慎某忠薦謹信濟以材敏周廬屯候之士武庫弓鎧之器往顯總治僉曰汝諧其尚懋哉以祗朕命

太僕卿制

書曰僕臣正厥后克正蓋親近左右有輔導之義矧車府廐馬牧監之政莫不咨焉非得其人曷稱厥位某材質敏明久更器使司馭之選汝惟克諧其祗厥官以服朕命

大理卿制

折獄詳刑之事朕所重也典領之官位在九列正名之始選用非輕某明習吏治通於法令廷尉之任僉曰汝諧往其欽哉以率厥屬

國子祭酒司業制

學校之法雖使之通經術治文字然要其大致則在於明上之教以導民養人之材以成俗故師氏之位必惟其能某質性粹冲術業通博訓誨之任宜正寵名夫行其所知以先游學之士使風化之出自京師始待爾稱職可不懋哉

太學博士制

博士以文學為官往者列於成均其秩未正朕登之朝序所以尊庠序之教而勵士大夫也爾以經行選用往服厥官蓋尊其所聞以誘率學者汝之守也惟是懋哉

少府監制

百工伎巧之事展采備物之政典領之任位視列卿正名之初考擇惟慎某明習吏治勞閱有聞選於僉言俾踐厥職尚其祇飭以服訓詞

軍器監制

繕治戎械訓工程作之任置監典領禮秩甚隆正名之初考擇惟慎某明習吏事勞閱有聞選於在廷俾踐厥位尚其祇飭以服訓詞

太宗正丞制

司宗之於國於門內之治也然合遠近之屬而齊之有不得專於愛者其於斟酌緩急恩義之際信難處哉故

其屬有丞以參聽其事而交脩其官考擇爾能俾在茲選夫親九族以刑萬邦此有國之先務也其體朕心往從而長服茲是訓以欽厥司

諸丞制

丞於有司參其政事而察其稽失以材選用尚懋爾勤知開封府制

開封府朕建國焉天下所並湊衆大而俗雜尹正之寄非仁薦公勇材任煩劇不能稱其職今朕脩定官儀正其名號固將考求其實使効見於事則用人之際豈輕也哉某爽邁開達練習治體閱試惟舊功用顯白處以茲任莫如汝諧夫慈惠足以煦養惇弱剛嚴足以帖伏

奸強然導民之方尚有可識使四方有以觀則而朕有以仰成在汝勉哉以稱朕命

開府儀同三司制

開府之於榮名重矣矧優其禮命視于三事故其品為第一所以隆崇大臣古今之通制也朕順于舊典考正官儀惟是首於大階是用制其祿入秩莫厚焉非時宗工夫豈虛授某材資桀異識慮閎深莊重足以鎮浮精明足以成務熙帝之載有贊元經體之庸提將之符有折衝綏遠之效今百揆攸叙方內靖嘉時乃之功助朕致此是用峻其名秩申此寵章夫褒有功顯有德朕於尊獎近輔之心可謂至矣親百姓撫四夷爾於將順朕志之義可不懋哉尚體至懷徃承厥叙

開封府獄空轉官制

京師天下之聚俗雜五方之民至於智或侵愚強或凌弱巧偽滋出獄訟繁興統理之難為日已久某明敏開達曉習吏事輟自禁近厲之尹正以公於奉上之志絕阿以附下之私摘發姦欺動而必中彈治豪右勇於敢為使縲紲無非罪之嗟囹圄有空虛之效求之近歲罕能及此聞于朕德時惟汝加夫賞所以褒善而勸衆也進官一等疇爾之庸其尚懋哉以永來譽

樞密遷官加殿學士知州制

典國樞要之臣協相帷幄之謀彌綸疆域之事夙夜不懈

風力施於省決精明用於思慮蓋勤且煩如是而歷時且久豈朕優禮耆舊之意歟某忠加惠和德操惟邵先帝所遺以輔朕躬當國本兵庶言惟允而屢辭幾政每請彌確志不可易朕所重遠是用改進文階延升祕殿乃眷東夏處以近藩衍食真封併加寵數朕於隆崇直輔時其勞逸使得自擇出入之宜可以為有恩矣爾於迺心王室罔以內外無忘益勵始終之節其可以不勉哉

侍讀制

蓋用儒學之臣入閣侍讀所以考質疑義非專誦習而已其列於分職始自開元而朕尤意嚮之某博通今古服在從官茲選甚高屬爾惟允朕以未聞於史者究觀前世之變而至夫理亂興壞之際未嘗不反復焉其悉所知以輔朕志是為爾守其往欽哉

殿前都指揮使制

朕擇材勇之士備官屯之兵以宿衛京師填附方夏置帥殿陛屬之董齊非強毅忠勞閱試惟舊不在茲選豈非重歟某薦實沉雄明於策慮護邊制敵身有顯庸茲用命爾就列大廷典綏王旅建旄立纛為國藩翰爰田真食並錫寵恩夫兵有繫刺射馭之能有坐作進退之法教習可以程其技節制可以閑其侮然能使之合心一力則在知所以附之能使之取威決勝則在知所以用之審如是焉厥惟難矣蓋熟之於易所以圖其難得

之於素所以應其變非造刑而後定計非合戰而後屈人故師飽於逸而朝廷遵馬肥於休而夷狄叙惟予之武以無敵於四方則爾之良亦有聞於來世往遵辭訓以服厥官

使相制

在昔大雅所歌成周之盛呂使申伯並為國藩休父太師實將王旅出入踐更之雖異中外屏毗而則均時予宗臣分保近服蓋循斯義以告在廷某精慮造微翹材絕衆崇論閎議富于文辭強識博聞飽於術學繇禁林之缺納任廊廟之弼諧浸更歲時休有功列而屢形懇請願避煩幾雖敦譬之甚勤顧壯懷之難奪是用錫之

士宇寵以節旄視宰路之等威益爰田之恩數往釐東夏外倡庶邦予有式羣群之典彝爾其底迪予有覃四方之德澤爾其布宣以來輔於本朝以阜康於生齒配于前哲屬在老成其代天工矧久聞於大政迺心王室尚思告於嘉猷

節度使制

有地千里治兵與民內衛京師外拊疆場非文武器幹望臨一時朕所寵嘉不在茲選某溫良能斷沉靜善謀有道著於當官周材見於經務承流宣化善政有聞綏遠折衝壯猷彌顯是用錫之士宇授以節旄生齒寔繁屬爾以安輯師屯甚衆諉爾以訓齊以作股肱之戾以

為國藩輔之重無忘忠力庶訖外庸惟亮天功待汝守
四方之効無輕民事副于安百姓之心尚體眷懷豈煩
多訓

節度加宣徽制

維昔牧伯長師之官有土與民共于外服所以為國藩
輔今方鎮之任連數十城之地籍兵與衆而授之建旄
立纛殿于大邦以作衛王室亦惟用稽于古非文武之
特才擅一時孰能稱茲選哉厥有顯庸宜加寵命迺揚
孚號以告庶位某莊毅足以任重肅哲足以提身有能
斷大事之明有克勤小物之慎考于僉議付以成師宣
化承流實裨治體折衝綏遠克暢武經故能紓朕之憂
副人之望夫德茂者其賞異功隆者其報殊是疇其底
績之勤錫以宣猷之號揆于常典非朕爾私盖位重者
其憂深祿富者其責厚名數禮秩朕既無忘爾勞功實
事為爾尚協朕之志矧夫填臨塞路總領兵防班籍聯
于輔臣謀畫參于國論其思勉勵以副眷懷

軍帥制

瓜牙之臣典領周衛非特強主威以鎮內外也盖禮彌
盛者備彌飭上下之節然也則任吾事者豈可以非其
人哉某沉勇忠實勞閱有聞蔽自朕心俾供厥服仍遷
位等其尚叙承

將軍制

為國藩輔之重無忘忠力庶訖外庸惟亮天功待汝守
四方之効無輕民事副于安百姓之心尚體眷懷豈煩
多訓

節度加宣徽制

維昔牧伯長師之官有土與民共于外服所以為國藩
輔今方鎮之任連數十城之地籍兵與衆而授之建旄
立燾殿于大邦以作衛王室亦惟用稽于古非文武之
特才擅一時孰能稱茲選哉厥有顯庸宜加寵命迺揚
孚號以告庶位某莊毅足以任重肅哲足以提身有能
斷大事之明有克勤小物之慎考于僉議付以成師宣
化承流實裨治體折衝綏遠克暢武經故能紓朕之憂
副人之望夫德茂者其賞異功隆者其報殊是疇其底
績之勤錫以宣猷之號揆于常典非朕爾私盖位重者
其憂深祿富者其責厚名數禮秩朕既無忘爾勞功實
事為爾尚協朕之志矧夫填臨塞路總領兵防班籍聯
于輔臣謀畫參于國論其思勉勵以副眷懷

軍帥制

瓜牙之臣典領周衛非特強主威以鎮內外也盖禮彌
盛者備彌飭上下之節然也則任吾事者豈可以非其
人哉某沉勇忠實勞閱有聞蔽自朕心俾供厥服仍遷
位等其尚叙承

將軍制

朕有連營列校之衆以宿衛京師鎮撫諸夏能使士齊而奮其惟統督之臣求之在廷其選甚重某忠勇仁厚將以致謀使治吾軍必能副朕所屬今閱士之藝朕皆親臨拔其異能而汰其疲軟其於撫循訓勵之方可謂至矣爾於典領惟公賞罰可以服其心惟薦恩信可以致其力使處則有以養朕之威出則有以揚朕之武待爾任職稱朕意焉

都虞候制

士之以材武宿衛左右者其選甚精而虞度候視於軍中者其任甚寵某忠勇有勞宜在此位進遷使號其往欽承

都知制

門闈房闈之間朝夕給事非謹信忠篤烏可處斯任哉某服勞左右閱歲已深淑慎厥躬朕所考察俾率厥屬往惟汝宜其思永于厥修尚終綏于榮祿

內臣制

給事長秋服勤惟舊今其老矣思就便安祿爾之勞宜進位等尚思祇服以稱朕恩

責帥制

朕拊士於閒暇之時蓋將責其効也至於臨敵逋亾朕雖假之以恩而將帥之臣則當濟之以肅使紀律章明然後威可勵而士可用也爾握兵之要宜知其職而潰

卒之入煦煦受之勞問餉給如勞歸師使夫三軍之衆將何視焉有苟簡姑息之心無守正奉公之誼閩外之事朕孰賴哉議罪正刑有國之典奪其近職處以偏州尚自省循茲為薄責

監司制

分部而使連數十城事之與奪吏之絀陟係焉古方伯之任也其選甚重固無假人爾脩潔純明治行強敏刺督之寄往共厥服夫能使政舉刑清和樂交於上下人足家給富饒洽於公私皆汝守也可不念哉

廣西轉運制

自既開百粵而地盡南海提封萬里莫不內屬本朝之制始分桂林以為西部非獨鎮撫吾民亦以綏馭山居谷聚竝海之蠻夷故將命而使其選常重爾嘗試而可居是用任屬惟柔遠則能邇其務宣布上恩輯寧異土無失朕指往欽厥司

蜀轉運判官制

西南之地延袤萬餘里外臨殊俗內雜谿谷諸蠻列州成縣以保安吾民境大人衆故屬部為四而利居其一最遠且險參於使事其選甚高求於在廷是用屬爾夫保民以仁而懷遠以德茲朕所嚮其往欽哉

轉運使制

國家歲漕東南之粟以實京師故命使部之臣推擇能

吏使度材具舟以濟其後爾應其選歲課甚優是用遷
秩京司以為爾寵朕於臣下之勤勞雖微且遠無所遺
矣則爾之自効可不勉哉

陝西轉運使制

分部而使兼地數千里治兵與民與夫征賦之出入自
陝以右則又與疆場之事具於寄屬必惟其人察于在
廷無以易爾夫使督課明而政事舉經畫當而財用足
吏與士皆悅而勸兵與民皆贍而靖爾之任也其尚起哉

提舉常平制一

朕憫農之不易故擇材審之臣分部四出以平其政令
而佐其衣食之業爾以能聞當是任屬其務知朕之意

在於惠民往慎厥司慰彼黎庶

提舉常平制二

朕憫夫農之艱且勤故詳為勸助之政又擇能吏分部
四出使推而行之爾以材聞預在茲選其思宣布朕恩
使敦本業之民安其田里而足於衣食則爾為能稱其
職可不勉哉

元豐類藁卷之二十六

明進士巡按湖廣監察御史後學姑蘇王忬校刻

制誥擬詞

知州制

昔先王之法道民以德齊之以禮而有耻且格後世不及然破觚以為圓斲雕以為樸禁罔踈闊而吏治蒸蒸不至於姦猶為近古朕甚慕之今能與吾共成此理者其唯循良之吏乎以爾為能與在茲選使刑罰清而風俗美爾能善於其職則明考察而公賞勸朕豈貳於必行其尚自強方觀爾効

知河陽制

盟津冀豫之域皆河向洛成臯之間天下之重地也山川之固為國屏翰分土而治非文武之特曷可以當選授哉某以材進按閱試已孚俾仍近班往祗厥服有生齒之衆屬爾撫和有連營之師待爾綏輯尚茂循良之效庶寬西顧之憂

知軍制

開建城壁本以輯治軍旅今四方既平而假守之臣實任民事列於有土之官矧朔北並邊寄屬尤慎爾以選擇往祗朕命夫能宣布恩威以拊循吾人而懷附異俗則為善於其職尚思爾守無替訓辭

通判制

川有治中以攸助其長綱紀衆務舊矣今列城之守皆有貳焉蓋亦其任也爾以考擇往祗厥叙尚思稱職以報朕恩

罷館職加官制

夫為官擇人處其名者必任其事而儒館之設有位彌而無分儼使學士大夫將何以效其實歟是用命爾進陷一等而罷其虛稱其有異能朕將明試以功庶爾之材得施於用以成朕招俊乂康庶位之意焉其尚懋哉

賞功制一

王師西封爾能奮力行陣斬獻首讎稽諸賞典宣進官榮爾尚勉哉益圖來効

賞功制二

擐甲執兵人之重任賞信而速所以勸功爾爰整我師
徂征西土大殲醜類來獻厥浮圖爾之勞進階一等尚
思奮勵以侔異恩

團練使駙馬都尉制

大長公主吾姑也位號禮服褒崇光大國有奕章蓋其
下嫁必得勳閥之門良能之士然後可以成先帝愛育
之仁而稱朕隆崇之誼某貴舊家子內外行完是用選
見于廷命之進尚團兵重任倅馬美名兼而授之蓋稽
故事夫恭儉靖慎可以保令問而綏寵祿茲惟朕訓汝
尚勉哉

磨勘轉官制一

吏之在位者積歲月之勤應有司之格必有甄進以明
勸獎此國家之典也今序爾之勞遷位一等往思祇服
以稱朕恩

磨勘轉官制二

朕謹名分正官守以董齊百工至其有試用之勞無踐
履之玷則皆稽其歲月法有甄進所以使吾勤事之吏
知所勸也今有司比爾之課應於遷格宜升階品以允
新書其服朕恩往思來効

軍功制一

惟羞於惡世盜西疆理將殄除內自生變致天之代非

朕敢私爾躬提偏師摧陷醜類震動河外宣明國威破
竹之功成在旦夕賞不逾月朕尚遲之用遷爾官以勵
衆士能殲大孰當有異恩

軍功制二

河外之地我之舊服羗能靖縱則以昇之今其將亡自
相戕害爰命討伐蓋將天威某沉勇有謀提兵以出獻
俘斬馘屢奏厥功擢進使名以昭信賞能殲首惡尚有
異恩

軍功制三

朕惟羗之猖狂內相賊殺致天之伐爰命六師止除罪
人復吾故地而已爾握兵而出屢以捷聞蓋夫軍賞之
行速則衆勸是用進爾之秩以激士心尚有不次之恩
以待凱還之喜

新及第授官制

朕立學以養天下之材設科以進其造秀之士其於教
導推擇欲成美俗於四方得羣能於庶位者可謂盡其
意矣爾以經行文學選自朕躬命以一官將觀汝效往
祇厥叙思稱朕恩

責將制

汝始以微功進朕不次用汝而屬之守邊乃冒吾法出
蠻夷之中發人採金無出入之籍有侵盜之刑朕惟不
欲數使遠人煩於追逮繫獄也寧失汝罪不究窮之

堂後官轉官制

吾調兵于外而號令節制之繇中出者汝以宰屬與於
治文書赴期會能辦吾事進秩一等以獎爾勞尚思恪
勤無墜厥守

詔

勸學詔

朕惟先王興庠序以風四方所以使學士大夫明其心
也夫心無蔽故施之於已則身治而家齊推之於人則
官脩而政舉其流及遠則化民成俗常必繇之古之所
以長人材厚人倫者本是而已朕甚慕之故設學校重
學官之選而厚其祿凡欲以誘誨學者庶幾于古也而

在位者無任職之心承業者無慕善之志至於師生相
冒挾賂為姦器訟置然駭于衆聽而况欲倡率訓導洽
于禮義磨龍角陶冶積於人心使方聞脩潔之士克於朝
廷孝悌忠篤之風行於鄉邑其可得乎朕甚憫焉故更
制博士而講求所以訓勵之方定著於令以為學制予
樂育天下之材而庶幾先王之治者可謂至矣自今有
敦行誼謹名節肅政教出入無悖明于經術者有司其
以次升之使聞于朕將考擇而用之以勸于爾眾士有
偷懦怠惰不循于教學不通明者博士吾所屬也其申
之以誘導使其能有易於志而卒歸於善固吾之所受
也予既明立學之教具為科條其於學者有獎進退黜

之格以昭勸戒至於學官其能明於教率而詳於考察
有得人之稱則得以信賞若訓授無方而取舍失實亦
將論其罰焉明以告爾朕言不欺尚其懋哉無詒爾悔

勸農詔

夫農衣食之所由出也生民之業莫重焉一夫之力所
耕百畝養生送死與夫出賦稅給公上者皆取具焉不
幸水旱螟螣之菑往往而有可謂勞且艱矣從政者知
其如此故不違其時不奪其力以使之明時之因析以
授之差地之腴瘠以處之春省耕秋省斂以助之詩曰
饁彼南畝田畯至喜言上所以勞之也又曰駿發爾私
終三十里言上所以勸之也其獎勵成就之者如此朕

自承天序內重司農之官外遣勸農之使為之弛力後
均地征修水利或一雨愆期則憂見於色或一穀不成
則為加惻怛有復除之科有賑恤之令夙夜孜孜勞心焦
思者凡以為農也今耕者衆矣而尚有未勉墾田廣矣
而尚有未闢豈拊循勸率有所未備歟抑吏怠而忽不
能宣究歟有司其於農桑之務益思所以除害興利詔
令已具者無或雍闕所未盡者勿憚以聞要使緣南畝
之民舉忻忻然樂職安業洽於富足稱朕意焉

正長各舉屬官誥

蓋聞堯之治曰百姓昭明舜之治曰四門穆穆然則當
是之時在位皆君子其是非不惑可知也故堯欲釐百

工舜欲熙帝載求可任者皆訪諸四岳因四岳以命禹
又因禹以命稷契臯陶因羣臣之臣念日以命重益伯
夷因伯夷以命夔龍其審官用賢不自任其聰明而稽
之于衆如此然存於書二帝所命者羲和九官十二牧
皆官之正長也至於屬官則未有二帝嘗命之者其遺
法之可考則周穆王命伯景為太僕正戒之曰慎簡乃
僚無以巧言令色便僻側媚其惟吉士則自擇其官之
屬者官之正長之事比先王之成法也漢魏以來公府
郡國亦皆自辟其屬而唐陸贄請使臺省長官自擇僚
屬蓋上下之體相承如此以周天下之務此古今之通
理也今朕董正治官始自三省至于百工皆正其名夫

使在位皆君子而是非不惑此朕素所以厲士大夫也
故凡官之長貳朕既考擇而任之尚書政本也自卽已
下用吏甚衆其令僕射左右丞尚書侍郎各於其所部
員有未備皆舉二人以聞朕將擇而用之其未用者亦
識其名以付用朕稽于古以正百官稽于衆以求天下
之士其勤可謂至矣惟官之長貳之臣皆朕所屬以共
成天下之治其尚體朕意所舉惟公以應朕之求所陳
惟實以嚴朕之詔其得材失士有司其各以等差具為
賞罰之格朕將舉而行之賞吾不恪罰亦無捨非獨搜
揚幽滯庶幾為官得人亦將以觀吾大臣之能使朕得
與衆士大夫合志同心以進天下之材作則垂法行之

于今以詒後世追于先王之成憲無令唐虞有周專美
于古不其美歟咨爾庶位其論朕意懷一體

賜高麗詔

蓋聞在昔夏后分天下為五服地有遠近故治有詳略
而聲教之盛東漸于海朕甚慕之願德不明何以逮此
而爾東國之君欵誠內附數遣使者乘不測之川獻其
方貢惟爾之義朕實寵如宜有異恩以稱勤恪而爾比
緣養病以醫為請眷然東顧朕預憂之是用擇遣方技
之官具舟以往爾惠彼一方神明相祚藥劑所補以時
康寧達于予聞欣慶方厲而遽馳僚從來致謝章覽以
慰懷獎勸良厚爾乃自祖以來保乂彼土其尚願精神
強飲食格于眉壽以均福于有衆使爾有世濟其美之
功而朕預聲教及遠之休其始自今末乎于好

策

擬代廷試進士策問三首

策問一

朕有志於卑漢唐之治而欲比迹於唐虞三代之盛故
於書無所不學而通其意於天下之事無所不講而極
其本末於人之材長養成就之者甚厚求而用之者甚
至於民之務憂勤思念者甚詳撫而綏之者甚力患風
俗之敝也正已以先百姓而明於教示患政理之陋也
稽古以定制而謹於持循欲斥夫疆土勞於經武欲

懷附夷狄也廣於推恩人之所欲者不敢違人之所惡者不敢強賞不敢以喜而濫刑不敢以怒而逞羣臣之進對者夕請而朝見之四萬之奏事者旦入而暮報之未嘗有聲色之娛未嘗有畋遊之好不營宮室不崇苑囿衣服飲食取具而已兢兢業業不敢暇逸日慎一日十有六年于茲矣惟先聖王之烈雖自視歛然察其用心如朕者亦可以無憾矣然古之大有為之君必有大效於天下至於小能小善亦各有小補焉奚獨至於朕也意彌篤而功未見於人行彌勵而德未見於世豈所謂是者非歟所謂能者否歟抑所行者為可止歟所舍者為可用歟將在位者奉承法令苟為空文而不務究自擇

策問二

夫有二南之化則有羔羊之大夫免置之士廣漢之女其成人之材則見於思齊其成物之性則見於行葦蓋王者之治繇近及遠其效如此何其風俗美而流澤深也今朕躬禮義以先天下恐其未諭也崇庠序以導之縻一作靡爵賞以勸之患其未從也以政率之以威董之

可謂盡心矣然朝廷之臣未能有素絲之節正直之行
中林之士未能有慎獨之心女子之誼未能有翹翹之
絕況於有德有造成人之材牛羊勿踐逐物之性可望
其髣髴乎朕於士民憊精刻一作意以待其善而天下
靡靡便文苟偷而已何其習之難變也夫先王之教其
本豈易於身先之其具豈易於崇庠序縻爵賞修政刑
以將之與今之所務者同也然以今方古違從之效異
何也豈今之所知者不明所尚者不審歟抑人散久矣
不可以復化歟子大夫待問于廷其以經對

策問三

朕獲承祖考懼德不明故小大之事躬親省決以夜繼
日不敢自暇而政未加善側身踐行兢兢業業不敢自
逸為天下先而俗未加厚崇庠序之化信賞罰之法以
開導而士未加勵憫農惠商補其乏闕除其疾苦以勸
助而民未加富礪器械教士率所以經營之者甚具而
武事未立也定制度正官箴所以彌綸之者至備而文
治未治也至於百工未昭彛倫未叙四民未盡得其職
萬物未盡遂其性中國之勢或詘於夷狄九州之地未
一於舊服是一皆戾古豈朕之不敏所知者非其要所
繇者失其統歟抑羣臣之在事者不稱其任不能輔任
歟將垂繆之習久更革損益之始其功難見歟朕之待
物者未嘗不以誠而下之應上者皆文具而已是何故

也意朕之所為與古之所以致治者無異而其効之不
同何也二帝三王秦漢以來迄于唐及五代雖功德有
間然其所以治且昌與夫所以衰亂失之者其跡可考
其原必有在方其治且昌也所繇之路先後本末其一
致歟抑有殊也其衰亂失之也浸漸積累所以致之一
揆而已邪抑不然也知古今明治亂子大夫之職也其
具著于篇朕將親覽

元豐類藁卷第二十六終

元豐類藁卷第二十七

明進士巡按湖廣監察御史後學姑蘇王忬校刻

表上

謝中書舍人表

伏承制命授臣試中書舍人者甫上程篇遽塵寵任載
惟遭遇倍集兢慙中謝孟聖君難諭之情將欲施於彌
令得當世能言之士然後達於文辭矧今綱理四方彌
綸庶政肇惟新之王度備久簡之官儀計謀常越於拘
孿注錯舉為於希闕豈伊凡庶可測高深方當覺悟邇
遐使徧知於上意訓齊內外用丕變於羣心尤資演暢
之材盡曲丁寧之旨布為邦典茲謂人文顧在臣愚豈

堪此選伏况皇帝陛下超逾千載特起一時躬堯帝之
聰明而不忘講學集成湯之勇智而無勸咨詢惟左右
前後之臣有耳目腹心之寄尤非淺識所可叨居如臣
性寔滯蒙器非廣博知自強於名節耻陰附於貴權無
因緣毫髮之扳援有積累丘山之忌嫉晚逢睿聖獨賜
收憐褒加特異於常倫進用每從於中出猥以五朝之
大典屬於一介之孤生已愧缺然將安稱此敢期誤寵
仍寘近班敷尊訓辭懼空踈之難強追參諷議憂蹇淺
之易窮於風波流落之餘以蒲柳衰殘之質自循涯分
曷副恩榮雖日月之光何加於潤色而天地之德無待
於論恩然臣素堅好古之誠粗識愛君之義既抗顏而

就列敢恕已以懷私謹當尋繹舊聞用闡揚於名命激
昂懦志庶補助於謀猷仰荅主知誓殫臣節臣無任

齊州謝到任表

伏奉勅命就差知齊州軍州事已奉今月十六日到任上
訖顧以諸生備茲煩使據非其所懼不克堪中謝伏念
臣素乏他長偶知好學議先王之制作嘗究本原論夫
子之文章頗探闡奧歷事聖君於三世與游儒館者十
年不知苟曲以取容但信朴愚而自守比緣私計請貳
外藩嗟疾病之餘生困米鹽之細務方指期於滿歲將
垂翼於故棲遽此外遷處之劇郡維般陽之列壤寔季
崩之遺區習詐而夸著流風於在昔多盜與訟號難治

於當今比試用於此邦必資求於強吏蓋因能而任官者不違其分則量力而受位者得竭其材豈伊儒懦之資可副浩煩之用恐殫精思無補毫分然而繇積累以冒恩寔養成之有自此蓋伏遇皇帝陛下智周萬物明照四方在踈遠迂賤之中而察其所守無左右遊談之助而知其所長故令覆露之仁及此滯蒙之質敢不無忘夙夜勉盡疲駑行歸于周久自安於直道老當益壯誓無易於初心仰望闕庭臣無

襄州到任表

伏奉勅命就差權知襄州已於今月二十七日到任上訖緣同氣之私恩陳便親之微志就更善郡得侍安輿

中謝伏念臣素堅回學之心幸遇好文之主備名儒節十有三年然而三易外邦五回星歲比亦再過於雙闕未嘗一對於清光常存傾藿之誠雖知向日居有戴盆之勢何以望天而臣昨治濟南最為煩劇野有羣行之盜里多武斷之豪馴致肅清始熄凶殘之害自強柔懦頗殫竭蹙之勞今者或就安閑少休疲鈍出觀美俗尤多莫廣之高入奉慈顏不憫汝墳之瘁茲為竊冒厥有端原此蓋伏遇皇帝陛下獎引士倫推崇世教小藝片言之善偏長一曲之材皆欲養成未嘗棄廢故令優佚俯及孤蒙敢不拊慰此民宣明上德末念沉碑之舊自願何功未忘投博之勤庶幾小補臣無任

洪州謝到任表

伏承勅命就差臣權知洪州軍州事充江南西路兵馬都鈐轄已於本月二十四日到任上訖撫臨便郡獲奉於親闈總制屬城寔蕪於故里中謝伏念臣志雖擇善材不過人玩思詩書無出倫之異見遊心翰墨多涉俗之塵言竊食累朝備官儒館智非早悟曾不習於人情學匪蕪通固難堪於世用茲緣私請得假善藩惟八換於歲暮已四臨於外服幸遇非常之主未奉燕閒實當難得之時獨無稱效儻獲伸於肝膈冀少益於毫分伏惟皇帝陛下恭儉愛人聰明好古卑漢唐之近事慕堯舜之遠圖臣敢不上體聖心勤脩民政奉行寬大方蓋

瘁於茲時補助高深庶納忠於來日仰望旒宸臣無任

福州謝到任表

伏奉勅命授臣守本官直龍圖閣就差權知福州已於今月初九日到任上訖列職內朝分行督府荷收憐之俯及省孤陋以何堪中謝伏念臣蹇薄多艱慙愚少與遇繼承於興運未進望於清光至於九換歲暮常從外徙四臨州部曾未代還茲者備延閣之美名假東甌之劇郡願惟同氣亦預改藩但虞人品之輕莫稱主恩之厚然臣最為寒族實奉偏親臣弟既適於遐陬臣愚固難於遠役理當懇請輒奉冒聞雖未賜於矜從亦終寬於僭黷頗識事君之義敢忘奔命之恭惟皓首之慈闈

抱累年之宿疹牽衣辭訣泣涕分馳計音信之往來殆將萬里阻晨昏之定省各在一涯足感動於人情况親逢於孝治草茆弱質素依及物之仁大馬微誠終冀因心之恕再念臣撫臨城邑勞問士民皆狎處於太寧但遵行於明詔則臣實慚尸於廩食曷補報於寵靈皆出誤知致斯冒處伏惟皇帝陛下多能天縱盛德日新躬神聖之姿而蕙容小善履富貴之極而深達下情在於隱恤之心豈間么微之跡敢不誓殫勤瘁匪懈夙宵懃海徼之幽荒布德音之寬大承流寵寄方自效於驅馳反哺愚情冀尚蒙於憫惻仰望旒袞臣不任

明州謝到任表

臣於去年十二月於江寧府進福州公文送到勅牒一道就差臣權知明州當月十八日於真州據進奏官伏淮中書孔目房帖子臣乞迎侍老母赴任不行已於今年正月二十五日到任上訖預於分土愧在假人竊自省循懼無報稱中謝伏惟皇帝陛下有聰明睿智固天縱之高姿有恭儉慈仁不世出之琦行上嘉堯舜之際下悼漢唐之間以超曠之迹為可追以苟簡之治為無取甚盛德之事敏於絕倫大有為之君審於在已所以更張庶政憂憫百姓之心至於推廣大恩鎮撫四夷之略無忘夙夜匪懈斯須其志之所任則有孔之卓其行之以力則有禹之勤若夫甄序羣材蒐揚衆論一作長

一曲之善半辭片說之工遠自巖穴之幽深旁暨草萊
之踈賤莫不從容賜對以盡其情委曲因能以收其用
可謂三代以後特起之盛時千載以來幾希之嘉會而
臣濫中臺之優秩玷內閣之美名然而荏苒十年周流
六郡當陛下闢四門以延天下之士而臣未得一望於
清光遇陛下開數路以來天下之言而臣未得少陪於
末議蓋茲遠跡最謂多竒故雖抱於愚忠每自安於靜
晦竊恃皇明之必照終期素蓄之獲伸昨者爰自江吳
就更閩粵喑有畏塗之阻貌無將母之因賴上威靈致
寇攘之熄滅屬時休慶獲稼穡之豐登旣此蒙城且將
滿歲輒露由衷之請果紓及遠之仁召自天涯還之闕

下已慰循陔之念更諧拱極之誠方攬轡以在行復分
符而補外維鄞江之列壤寔浙右之名邦素號寬間可
容尸素尋敷陳於奏牘冀迎奉於輶輿繄是微情未回
洪造已宵行而祇命甫夕惕以當官眷是遐陬邁此昭
日來廷之國實為出入之途表海之城方始經營之緒
仰荷選掄之寄敢忘策勵之勤矧昔稟於成規庶可圖
於薄効再念臣比更遠守久去偏親出自推恩幸茲易
地環走已臨於新部相望猶邇於舊封仰瞻天日之光
未親戶牖俯計晨昏之戀尚隔庭闈敢是羈單了無黨
助每益堅於已志獨有待於主知自効驅馳敢廢資忠
之義庶依長育未愆致養之私傾葵藿之一心極蓬菲

之冊狼論疇有在之死無渝仰望冕旒臣不任

亳州謝到任表

伏奉勅命就差權知亳州軍州事已於本月十六日到任上訖比從閩粵中易句章益起堅城以強表海之勢闕開列館以待來廷之賓昔承規畫之餘方始經營之緒程工省費俾無靡敝之材計力與庸俾無發召之役以至屬材能而董事分什伍以庀徒已略具於科條可粗施於士吏身方督作匪懈於服勞法有避親遽蒙於易地竊陪京之寵寄申將母之微情輒冒恩榮何堪報稱中謝臣竊觀前籍所載千載以來大道鬱而未彰莫承于古王者疏而不作無甚茲時在理可樅久衰必復

去五代八姓淩微之弊肇自宋興承一祖四宗丕顯之謨實在陛下蓋繇體粹精之睿質執剛健之純誠運獨斷之明則天清水止昭不殺之武則雷厲風行故能並越百工越熙庶績追二帝三代之甚盛行兩漢有唐之所難使天地人神莫不順序雨暘寒燠罔或違時厥戴德者田耕井飲之倫蓋游泳於遐邇之內其蒙澤者螽潛媪伏之類無殫殫於胎卵之中寶鼎靈芝之聲流於樂府來燧嘉穀實物於太唐至於武庫斂藏之兵羽林閱習之伎匠盡其巧而工妙擅於一時士盡其材而精銳軼於近代威靈所覆夷貉允懷是以扶桑戴斗之區度索尋橦之國來於四海之外曾無一歲之虛蓋令不待

期而萬里奔走治非有跡而九域阜安可謂不世之宏
休難名之盛烈夫應之福者既極其厚則報其貺者必
盡其隆方當秩盛禮大樂之文薦諸清廟采增封廣禪
之義類于名山於以較著日新出之顯庸闡布天錫
未昌之大業臣性姿固塞人品眇微獨於輩流素嗜文
學如得鏤諸金玉述陛下赫赫之功播在筦絃紀陛下
巍巍之德措之六藝而無愧告諸百世而無疑庶幾不
後古人可以昭示來者存於肺腑積有歲時然臣籍雖
預於內朝身屢更於外服已彫零於齒髮久轉走於東
南曾未得測望塵於清蹕之間參第頌於從官之後惟
堅悃幅欲效毫分今者獲便養於親闈預分憂於輔郡

上體焦勞之意敢忘夙夜之勤宣化承流方盡駑駘之
力望雲就日但傾葵藿之心注仰冕旒臣無

賀熙寧四年明堂禮畢大赦表

今月十三日樞密院遞到赦書一道以宗祀明堂禮畢
大赦天下臣已即時集軍州官吏將校等宣布訖代以
奉承聖考升配上天秩盛禮於法宮推大恩於率土中
賀伏惟皇帝陛下有聰明好古之質有恭儉愛人之誠
兢畏萬機仔肩一德燔柴展報既昭告於元功嚴父致
隆又推明於極孝越成釐事均布鴻休草木昆蟲皆令
受賜華夏蠻貊莫不歸仁臣心係北辰身縻東土永懷
故事難求汶上之圖獨遠清塵方嘆周南之滯想望旒

宸臣無任

賀熙寧十年南郊禮畢大赦表

今月初七日適到赦書一道以十一月二十七日南郊禮畢大赦天下者臣已集軍府官吏將校軍民等宣讀訖伏以人之所歸者莫如德天之所享者在於誠其惟聖王克有全美中賀伏惟皇帝陛下聰明稽古承繼祖宗慈惠愛人撫臨邦國有徧覆并容之大度有防微慎獨之小心不從遊畋不近聲色無紛華盛麗之好無便僻側媚之私歲時吉蠲以承七廟左右順適以奉兩宮其功施於人効見於事則宅仁由義縉紳之徒成材於學校超距蹋鞠熊羆之旅養勇於營屯甌窶汚邪之收

充於倉廩關通和鈞之利阜於市廛家有豫樂之聲人無愁怨之色協氣所召休應自殊鈞陳太微星緯咸若崑崙渤澥波濤不驚近則金石之聲一作音鳥獸忻蹈遠

則于羽之舞蠻夷駿奔象齒旅於闕廷龍媒納於闈廡是謂六府三事皆可以訶四海九州罔不率俾蓋巍巍而特起非瑣瑣之能闕前世議泰山之封謀梁甫之禪者度崇比大疇克登茲陛下抑而不圖謙以自牧以謂先后一作王創業垂統其功莫得而名上帝隕祉發祥其德無可以稱思所以報一本於心故寅畏嚴恭積之有素而齊明薰拔進而益虔在於物者不取其煩盡諸已者必求其寔是以蕭光之烈奏於宗枋柴燎之蒸焜於

郊兆幽隱昭荅神靈顧懷無疆惟休方寢昌於萬世不
敢專享故敷錫於羣元稽參典彝定著赦令弛張從理
同異稱情蠲罪膏而棄瑕疵錄勞能而縱逋負顯晦咸
暨洪纖不遺萬國之歡既交於冲漠一人之慶遂及於
蛟螭乎于上下之間極乎帝王之盛臣被學最舊蒙恩
寢深莫侍甘泉之祠獨嘆周南之滯第從臣之加頌未
効薄材望屬車之清塵但馳遠思想仰宸衷臣無任

賀元豐三年明堂禮畢大赦表

今日二十日樞密院遞到赦書一道以明堂禮畢大赦
天下者已即時集軍州官吏軍民宣讀訖竊以昊天無
聲之載人莫能名先帝罔極之恩物何以稱維總章之

正位秩宗祀之鴻儀可薦至誠用伸昭報中賀伏惟皇
帝陛下躬夙夜之聖質而博古多聞經特起之大猷而
虛心廣覽振千齡之隆緒紹三代之遐蹤霈澤之所
涵濡太和之所煦嫗華夏蠻貊無一夫不獲其宜草木
蟲魚無一物不遂其性爰求祭典用告王功蓋諸儒之
說為不經則折衷於孔子而近世之事為非古則取法
於周公罷黜異端推明極孝以尊莫大於祖故郊於吉
以配天以本莫重於親故享於合宮以配帝恩義兩
得其當情文皆盡其詳徹俎云初均釐甚廣君哉皇矣
實難偶之昌期巍乎煥焉信非常之盛禮臣幸逢熙洽
未奉燕閒一違前蹕之音四遇親祠之慶青雲多士皆

預橋門之聽觀黃髮孤生獨歎周南之留滯仰望旒宸
臣不任

賀克伏交趾表

伏覩進奏院報安南招討司已克伏交趾其首領李乾
德具表乞降者螻蟻之微自投必死乾坤之大終許更
生惟德及於幽遐實均慶於中外中賀伏惟皇帝陛下
順稽古憲叙正民彝鬯聲教於四方壹書文於萬國暗
海隅之昧俗肆井底之狂謀聖恩所懷凶氣自失雕題
交趾心服於威靈大賂南金歲遵於貢職允出止戈之
武是稱無敵之仁臣遠守藩維獲聞捷奏永懷竊抃寔
倍常情臣伏恨職守所拘不獲稱慶闕庭臣不任

慰慈聖光獻皇太后上仙表

今月二十日太皇太后遺誥奄棄宮闈者承問震驚失
容號慟臣某誠悲誠感頓首頓首伏以太皇太后表儀
三世德首於人倫保佑兩朝功存於王室遽違孝養未
究遐齡無間近踈寔均歎慕伏惟皇帝陛下痛貫宸極
聖情難居臣伏恨方守印章不獲躬詣闕庭臣無任

謝賜唐六典表

伏蒙聖慈賜臣唐六典一部者冒貢微誠敢徼寵賚獲
盈私望特出異恩中謝竊以繼正觀之造邦繼開元之
稱治財成唐典本庶務於尚書則象周官綴舊聞於經
禮行之當世垂及方來伏遇皇帝陛下接五聖之休期

振千齡之絕業號令風采卑秦漢而不言綱紀文章體
唐虞而特起爰因廣覽俯逮遺編俾加鏤板之傳賜及
在廷之士顧最踈之庸下忘輒請之妄逾猥荷并容預
均蕃錫敢不自強衰逮悉意闕尋竊典故之緒餘少俾
寡陋審官儀之委曲益勵疲駑臣不任

元豐類藁卷第二十七終

元豐類藁卷之二十八

明進士巡按湖廣監察御史後學姑蘇王忬校刻
表

謝熙寧五年曆日表

進矣院遍到宣頭一道伏蒙聖恩賜臣熙寧五年曆日
壹卷者竊以振舉舊章推明新曆欲謹天時之正俾諧
人事之宜藐是孤生與均寵錫中謝伏惟皇帝陛下力
行大道惇叙彝倫贊天地而平四時理陰陽而成萬物
爰茲頒朔咸暨有邦臣敢不深究土風詳求氣序躬勸
耕桑之業輔成坯治之仁仰望闕庭臣無任

謝熙寧六年曆日表

進奏院迺到宣頭一道熙寧六年曆日一卷賜臣收管者一與外符之寄再蒙班曆之恩久矣去朝幸茲拜賜中謝竊以天地陰陽之動不得違時垂魚草木之生必皆有政故茲告朔宣布有邦伏惟皇帝陛下兢慎萬幾協諧五紀式謹王正之授俾知民事之常臣敢不動靜詳觀夙宵祇奉庶召和平之氣用禪化育之仁臣不任

謝熙寧七年曆日表

進奏院迺到宣頭一道賜臣熙寧七年曆日一本者顧漸孤拙與被寵靈中謝竊以陶唐之定四時稽于曆象虞氏之齊七政審以璣衡蓋求於天道者能盡其宜則施於人事者不違其序伏惟皇帝陛下聰明好古仁厚

愛民深厚制作之方務協生成之理在於垂憲尤重頒正臣久去闕庭遠臨藩服惟竭遵承之力庶符欽順之心臣不任

謝熙寧八年曆日表

進奏院迺到宣頭一道賜臣熙寧八年曆日一本者竊以治曆于中所以察天時之運動班正于外所以一王度之推行舉是彛章施于有土中謝伏惟皇帝陛下至仁不世盛德無名協五紀以遂群生合二儀而成萬化迺明告朔咸俾守藩臣敢不悉心意究詳勵精遵奉庶盡承流之効俾無作事之違仰望闕庭臣無任

謝熙寧十年曆日表

進奏院遞到宣頭道熙寧十年曆日一卷賜臣者竊以推行歲時天道所以化育考正曆度人事所以財成故須朔之舊章爲守邦之先務伏惟皇帝陛下德兼載燾仁及昆蟲體履中和叙九疇而開物欽明象數齊七政以導民臣獲奉王正親承聖詔念闕庭之方遠藐然江上之身感星畧之屢新尚嘆周南之滯仰望旒宸臣不任

謝元豐元年曆日表

進奏院遞到宣頭道賜臣元豐元年曆日一卷者一遠闕庭十移星曆顧凋零於齒髮無報補於毫分中謝伏惟皇帝陛下叙大禹之九疇齊有虞之七政陰陽寒暑罔不若時草木昆蟲舉皆遂性循用頒正之典寵詒分土之官臣幸備守藩預聞告朔去親方遠已驚歲月之新許國雖堅更嘆功名之晚惟體在民之意庶俾及物之仁仰望冕旒臣不任

謝元豐三年曆日表

進奏院遞到宣頭一道賜臣元豐三年曆日一本者竊以脩人事者必也正時明天道者在於治曆爰從頒布俾一奉承中謝伏惟皇帝陛下則大君尊體元凝命成大府三年之叙合志於虞遂人政五紀之宜同方於禹是遵人統用謹王正獲以守邦預於受朔勸幽土耕桑之業方務承流采堯民作息之歌庶知戴德仰望旒袞

臣不任

進奉熙寧八年同天節功德疏表

伏遇皇帝同天節臣預於本州天慶觀鷲嶺興化禪院大殿上建置道場一月日及設齋功德疏各一軸金鍍銀軸頭紅羅複封全上祝皇帝聖壽者竊以績禹撫期蓋自天而開迹生商肇祚實與世以為歸故預託於坏鎔皆永思於戴燾中賀伏惟皇帝陛下性由仁義德備聖神維候紀於長羸屬祥開於震夙是敢致嚴道妙嚮意佛乘庶將不轉之心用獻無疆之壽臣無任

英宗實錄院謝賜御筵表

伏蒙聖慈以臣等編脩英宗皇帝實錄今月十四日開

局賜臣等御筵者方次舊聞已叨優禮省循非稱慚負失容中謝伏以先帝功德之殊將傳後世儒者文章之用正在此時猥以空踈誤當屬任甫磨鉛而就職遽置醴以均恩寵異群司幸踰素望此蓋伏遇皇帝陛下未懷先烈務廣孝思故因始於信書俾特豐於燕豆所懼不能名乾坤之至德摹日月之大明上以副陛下顯親之心下以盡愚臣歸美之志惟粗明於書法庶少補於素餐臣等無任

代皇太子免延安郡王第一表

伏奉制命蒙恩特授臣檢校太尉開府儀同三司克彰武軍節度使進封延安郡王者寵踰於德愧甚於榮輒

露危誠仰于睿聽臣某誠惶誠恐頓首頓首竊以袞衣
備物禮均上宰之崇土宇分封位列真王之貴非智能
足以謀國然烈足以及人屬在休明詎容玷冒若臣者
侗然固陋眇爾穉蒙雖甫逮勝衣習為容於趨拜而方
思就傳賴齒學之漸磨庶幾識古今之通方知國家之
大體施於為已可以持循必也當官覲無違曠已叨分
於將鉞復誤假於公主虛冒鴻私未伸薄効敢圖獎渥
荐及謗微視儀數於三台超爵名於五等既加真食仍
益爰田固非錄善而量能又異校勞而數最將安稱此
自頽缺然而况皇帝陛下處父子之間常先義訓君臣
之際每徇公言伏望察臣精懇之由秉不顧小嫌之反
汗許還新命俯遂微情使臣得奉定省於晨昏稍安幼
志報生成於天地更待壯年臣無任

代皇子免延安郡王第二表

伏蒙聖慈以臣所上表陳乞蒙恩授臣檢校太尉開府
儀同三司克彰武軍節度使進封延安郡王特賜批答
不允者輒布愚哀未回宸聽仰闕誨諭彌集兢慚臣某
誠惶誠恐頓首頓首竊以明德懿親在天功而有助隆
名重器為國論之所歸然後材位不浮望實相稱若臣
者夙依煦育生處深嚴雖無好弄之心甫逮垂髫之盛
方圖講學知臣子之大方庶得周旋奉君親之素教敢
意靡緣績用荐被寵靈遂兼將相之榮仍極王公之貴

雖參諸邦典或故事之可循而質以人情實煩言之可
畏顧茲冲昧尤積震惶伏况皇帝陛下新一代之彝章
革千年之流弊方循名而責課以官方而任人其於明
信賞之科必先於近然則推至公之誼宜始於臣惟
特寢於誤恩可曲全於拙分使乾坤之施不累於私親
則塵露之微庶幾於報上臣不任

代皇子延安郡王謝表

伏奉制命除授臣檢校太尉開府儀同三司克彰武軍
節度使進封延安郡王再奉表陳乞蒙賜批答不允仍
斷來章者祇膺詔版彌積覲顏蓋崇大於宗藩以盛強
於帝室豈伊獎渥可假幼冲中謝伏念臣器匪夙成材

無特異徒歸依於鞠育每親炙於高明欲善在身忘髡
髦之至弱知書可學慕佔畢之相從庶繇受教於童蒙
覲獲成能於壯大敢意攬攸司之密啓循歷去之彝章
寵以官儀體均於丞弼殊其爵列秩右於公侯揣稱何
堪踰涯已甚知隆名之難冒迫大號之既行控避莫從
震惶滋集此蓋伏遇皇帝陛下心潛高厚智極精微推
廣愛之仁以隆於父子盡大公之義以篤於君臣故獲
典之當行雖至親而莫間致茲異數猥及謏能臣敢不
仰體聖懷勤遵慈訓省躬擇術庶不蹈於匪彝臨事知
方或可收於近用臣無任

代皇子延安郡王謝皇太后表

伏奉制命除授臣檢校太尉開府儀同三司克彰武軍
節度使進封延安郡王再奉表陳免蒙賜批荅不允仍
斷來章者竊以盛威儀於宰路以重朝廷強形勢於宗
藩用臨方夏宜兼獎渥屬在親賢誤及幼冲倍深兢懼
中謝伏念臣蒙休宸極託蔭慈闈未闕六甲之書甫在
兩髦之歲揆材至薄曾無特異之資知善可遷竊有自
強之志已塵高位愧乏微勞詎意仁恩更崇命秩抗等
威於元宰躋爵列於真王自顧空踈將安報稱此蓋伏
遇皇太后殿下輔成世教陰厚人倫均至愛於諸孫假
餘光於釋蔭致茲異數猥被謨能敢不自勵童蒙嚮慕
日新之益庶幾壯大仰酬坤育之私臣不任

代皇太子延安郡王謝皇后牋

伏奉制命除授臣檢校太尉開府儀同三司克彰武軍
節度使進封延安郡王再奉表陳免蒙賜批荅不允仍
斷來章者異其恩數兼將相之殊榮尊以爵名極王公
之寵列雖優隆於天屬必攷察於人材假是幼冲懼非
宜稱臣某以感以懼叩頭伏念臣性非蚤悟學未少成
徒依均養之私甫及番髻之始已蒙休於帝所獲備位
於宗藩豈意慈憐更加褒進夫位崇者德厚祿重者功
高而臣無可錄之勞能冒非常之禮秩此蓋伏遇皇后
殿下彌綸內治則象坤元惇鞠育之至仁推獎成之素
志致滋渥澤諒及童蒙敢不盡子職之微勤無忘砥礪

答毋儀之大賜庶補毫分謹奉稱謝以聞臣以感以懼
叩頭謹牋

代宋敏求知絳州謝到任表

伏奉勅命差知絳州軍州事已於某月某日到任上訖
備官無効竊寵過優尚聯清近之班仍獲安閑之幸中
謝伏念臣器非宏遠性不敏明徒嗜好於文章寢推移
於歲月濫名儒館接武朝紳與釐垌牧之蕃參莅神州
之劇進聞邦計出假使符會仁祖之升遐圖信書之示
後起於衰病寄以討論旋躋右史之華遂冒西垣之選
惟茲典禮屬在奉常猥用滯蒙首當總領悉心謀慮雖
務竭於愚忠妄意變通遂自垂於素論寔下昭憲奚造

嚴科荷屈法以申恩止奪官而補外罪浮於罰慙溢於
顏何僥冒之使然寔矜全之有自此蓋伏遇皇帝陛下
乾剛獨斷坤厚無容躬親庶政而炤之以明付用群材
而養之以恕故俾兼榮於近侍尚容竊食於外邦仰戴
生成將安補報敢不服勤夙夜期練達於政經延見吏
民一作祇以誓作布宣於上德庶收來效少答鴻私仰
望闕庭臣無任

代翰林侍讀學士錢藻遺表

犬馬之質難駐於頽齡日月之光尚攀於爰景臣藻誠
悲誠哽頓首頓首伏念臣出於悴族進以謏材文辭講
說制策之科衆稱華選儒館掖垣經惟之職世謂清塗

獨編竊於美名蓋親逢於亨運至於總銓衡之要劇領
京邑之浩煩茂有勞能可論報稱肩寵靈而過厚致災
疾以交攻迫霜露之所侵且將漸盡幸髮膚之無毀得
以全歸方去闕庭長投泉壤輒陳遺志猶及能言伏願
皇帝陛下御六氣之和慎調興止享萬年之祚永庇華
夷再念臣偷殘息之僅存覲餘息之可丐敢祈仁睿終
賜矜憐臣有男進士崑孫男某親堂弟茂共出寒鄉稍
親薄枝葑菲不棄儻微祿之獲活魚一作救可供庶游
菟之未餒伏望聖慈並於文資內安排妄茲十澤愧在
忘廉保存歿之孤縱託始終之大賜生而無益曾莫及
於銜環死或有知猶庶幾於結草仰望旋宸臣不任

代太平州知州謝到任表

伏奉勅命差知太平州軍州事已於某月某日到任上
訖惟此方彫瘵之舊屬比歲凶飢之餘任在榘循懼無
稱效中謝竊念臣受材不敏託勢甚微竊卽位之寵名
濫憲臺之優選因蒙中詔獲備外邦方喜便於庭闈遽
已罹於家禍苟全生理復齒班榮用久次而得州以親
嫌而易地低回積日黽勉至官忽被新恩復還舊印江
湖孤蹇之跡道路奔馳之勞甫茲卽安敢忘盡瘁自惟
蕞爾何以及茲茲蓋伏遇尊號皇帝陛下日月之光旁
照萬物天地之德平施四方猥致妄庸誤蒙睿使當力
行於寬惠上副至仁惟少假於寵靈庶成薄効臣不任

代太平州知州謝賜欽恤刑獄勅書表

進奏院遍到勅一道賜臣欽恤刑獄者屬在煩暑聖躬無倦於焦勞言念繫囚恩旨遂加於惻憫中謝伏惟尊號皇帝陛下繼祖宗之功德體天地之生成發政施仁恐遺於一物勝殘去殺思厝於五刑謙不自專動遵故事眷幅員之至廣軫囹圄之未空申明詔以下寧飾守臣之撫視豈止奉行於時令固足感召於人和臣與被德音當宣上意惟盡哀矜之理庶符欽恤之心臣無任

元豐類藁卷第二十八

元豐類藁卷之二十九

明進士巡按湖廣監察御史後學姑蘇王忬校刻
疏

熙寧轉對疏

准御史臺告報臣寮朝辭日具轉對臣愚淺薄恐言不足采然臣竊觀唐太宗卽位之初延羣臣與圖天下之事而能絀封倫用魏鄭公之說所以成正觀之治周世宗初卽位亦延羣臣使陳當世之務而能知王朴之可用故顯德之政亦獨能變五代之因循夫當衆說之馳騁而以獨見之言陳未形之得失此聽者之所難也然二君能辨之於羣衆之中而用之以收一時之效此後

世之士所以常感知言之少而頌二君之明也今陛下始承天序亦詔羣臣使以次對然且將歲餘未聞取一人得一言豈當世固乏人不足以當陛下之意與抑所以延問者特用累世之故事而不必求其實歟臣愚竊計始進言者未有以當陛下之意也陛下明智大畧固將比跡於唐虞三代之盛如太宗世宗之所至恐不足以望陛下故臣之所言亦不敢効二臣之卑近伏惟陛下超然獨觀於世俗之表詳思臣言而擇其中則二君之明豈足道於後世而士之懷抱忠義者豈復感知言之少乎臣所言如左臣伏以陛下恭儉慈仁有能承祖宗一作宗廟之德聰明睿知有能任天下之材卽位以

來早朝晏罷廣問兼聽有更制變俗比迹唐虞之志此非羣臣之所能及也然而所遇之時在天則有日食星變之異在地則有震動陷裂水泉湧溢之災在人則有饑饉流亡訛言相驚之患三者皆非常之變也及一作又從而察今之天下則風俗日以薄惡紀綱日以弛壞百司庶務一切文具而已內外之任則不足於人材公私之計則不足於食貨近則不能不以盜賊為慮遠則不能不以夷狄為憂海內智謀之士常恐天下之勢不得以久安也以陛下之明而所遇之時如此陛下有更制變俗比迹唐虞之志則亦在正其本而已矣易曰正其本萬事理臣以謂正其本者在陛下得之於心而已

臣觀洪範所以和同天人之際使之無間而要其所以為始一作本者思也大學所以誠意正心脩身治其國家天下而要其所以為始者致其知也故臣以謂正其本者在得之於心而已得之於心者其術非他學焉而已矣此致其知所以為大學之道也古之聖人舜禹成湯文武未有不由學而成而傳說周公之輔其君未嘗不勉之以學故孟子以謂學焉而後有為則湯以王齊桓公以霸皆不勞而能也蓋學所以成人主之功德如此誠能磨龍長養至於有以自得則天下之事在於理者未有不能盡也能盡天下之理則天下之事物接於我者無以累其內天下之以言語接於我者無以蔽其

外夫然則循理而已矣邪情之所不能入也從善而已矣邪說之所不能亂也如是而用之以持久資之以不息則積其小者必至於大積其微者必至於顯古之人自可欲之善而克之至於不可知之神自十五之學而積之至於從心之不踰矩豈他道哉由是而已矣故曰念終始典于學又曰學然後知不足孔子亦曰吾學不厭蓋如此者孔子之所不能已也未能使事物之接於我者不能累其內所以治內也言語之接於我者不能蔽其外所以應外也有以治內此所以成德化也有以應外此所以成法度也德化法度既成所以發育萬物而和同天人之際也自周衰以來道術不明為人君者

莫知學先王之道以明其心為人臣者莫知引其君以
及先王之道也一切苟簡溺於流俗末世之卑淺以先
王之道為迂遠而難遵人主雖有聰明敏達之質而無
磨礱長養之具至於不能有以自得則天下之事在於
理者有所不能盡也不能盡天下之理則天下之以事
物接於我者足以累其內天下之以言語接於我者足
以蔽其外夫然故欲循理而邪情足以害之欲從善而
邪說足以亂之如是而用之以持乂則愈甚無補行之
以不息則不能見效其弊則至於邪情勝而正理滅邪
說長而正論消天下之所以不治而有至於亂者以是
而已矣此周衰以來人主之所以可傳於後世者少也

可傳於後世者若漢之文帝宣帝唐之太宗皆可謂有
美質矣由其學不能遠而所知者陋故足以賢於近世
之庸主矣若夫議唐虞三代之盛德則彼烏足以云乎
由其如此故自周衰以來千有餘年天下之言理者亦
皆卑近淺陋以趨世主之所便而言先王之道者皆緇
而不省故以孔子之聖孟子之賢而猶不遇也今去孔
孟之時又遠矣臣之所言乃周衰以來千有餘年所謂
迂遠而難遵者也然臣敢獻之於陛下者臣觀先王之
所已試其言最近而非遠其用最要而非迂故不敢不
以告者此臣所以事陛下區區之志也伏惟陛下有自
然之聖質而漸漬於道義之日又不為不久然臣以一

作所謂陛下有更制變俗比迹唐虞之志則在得之於心則在學焉而已者臣愚以謂陛下宜觀洪範大學之所陳知治道之所本不在於他觀傳說周公之所戒一作勉知學者非明主之所宜已也陛下有更制變俗比迹唐虞之志則當懇誠惻懼以講明舊學而推廣之務當於道德之體要不取乎口耳之小知不急乎朝夕之近効復之熟之使聖心之所存從容於自得之地則萬事之在於理者未有不能盡也能盡萬事之理則內不累於天下之物外不累一作蔽於天下之言然後明先王之道而行之邪情之所不能入也合天下之正論而用之邪說之所不能亂也如是而用之以持久資之以

不息則雖細必鉅雖微必顯以陛下之聰明而克之以至於不可知之神以陛下之睿知而積之以至於從心所欲之不踰矩夫豈遠哉顧勉強如何耳夫然故內成德化外成法度以發育萬物而和同天人之際甚易也若夫移風俗之薄惡振綱紀之弛壞變百司庶務之文具屬天下之士使稱其位理天下之財使贍其用近者使之親附遠者使之服從海內之勢使之常安則惟陛下之所欲何求而不得何為而不成乎未有若是而福應不臻而變異不消者也如聖心之所存未及於此內未能無秋毫之累外未能無纖芥之蔽則臣恐欲法先王之政而智慮有所未審欲用天下之智謀材諂之士

而議論有所未一於國家天下愈甚無補而風俗綱紀
愈以衰壞也非獨如此自古所以安危治亂之幾未嘗
不出於此臣幸蒙降問言天下之細務而無益於得失
之數者非臣所以事陛下區區之志也輒不自知其固
陋而敢言國家之大體惟陛下審察而擇其宜天下幸
甚

劄子

自福州召判太常寺上殿劄子

破明州

伏以陛下聰明睿知天性自然可謂有不世出之姿自
在藩邸入承顏色出奉朝請怡怡翼翼不自暇豫至恭
極孝聞於天下及踐大位內事兩宮外嚴七廟仁被公

族德形閨門嬪御備官不淫於色音樂備數不溺於聲
食菲衣綈務遵節儉臺卑園小無所增飾近習無便嬖
左右無私謁未嘗出遊幸未嘗從畋魚其於憂憫元元
勤勞庶政則念慮先於兆朕祗慎盡於纖芥晝而訪問
至於日晏夕而省覽至於夜分每群臣進見接之禮篤
而情通凡四方奏事莫不朝入而暮報雖大禹之勤于
邦文王之不暇食無以加此其淵謀遠畧必中事幾善
訓嘉謨可為世則者傳聞下土雖僅得其一二已足以
度越衆慮非可闕測可謂有君人之大德其高深宏遠
則憫自晚周秦漢以來世主不能獨出於衆人之表其
政治所出大氏踵襲卑陋因於世俗而已於是慨然以

上追唐虞三代荒絕之迹脩列先王法度之政為其任
在已可謂有出於數千載之大志變革因循號令必信
使海內觀聽莫不震動羣下遵職惟恐在後可謂有能
行之效蓋刻意尚行不差毫髮縉紳之士有所不能及
憂勞惕勵無懈無滛須臾又非羣臣之所能望可謂持
起於三代之後非常之主也愚臣孤陋熙寧二年出通
判越州因轉對幸得論事敢據經之說以誠意正心脩
身治國家天下之道必本於學為獻逮今十有一年始
得望穆穆之清光敢別白前說而終之臣以謂陛下有
不世出之姿有君人之大德與出於數千載之大志又
有能行之效特起於三代之後然顧以治國家天下之

道必本於學為獻於陛下何也蓋古之聖人雖出乎其
類接乎其萃然至其成德莫不由學故堯舜性之也而
見於傳記則皆有師其史官職其行事則皆曰若稽古
至於湯武身之也則湯學於伊尹武王學於太公見於
詩禮孟子在商高宗得傳說作相其命說之辭曰予小
子舊學于甘盤而傳說告之則曰學于古訓乃有獲又
曰惟學遜志務時敏厥脩乃來又曰惟學學半念終始
典于學蓋高宗既已學于甘盤矣乃傳說相之乃更丁
寧反復勉之以學其要歸則以謂當終始常念于學明
學蓋不可一日而廢也至於孔子之自叙則自有十五
而志于學至於七十而從心所欲不踰矩夫以孔子之

聖必至于學其學之漸每十年而一進至于七十矣其
從心也蓋不踰矩則傳說所稱當始終常念于學者雖
孔子之聖不能易也故楊子曰學之為王者事久矣堯
舜禹湯文武汲汲仲尼皇皇其已久矣聖賢之篤於學
至於如此者蓋樂而不亂復而不厭者道也測之而益
深窮之而益遠者聖人之言也知不足與困者學也方
其始也求之貴博畜之貴多及其得之則於言也在知
其要於德也在知其奧能至於是矣則求之博畜之多
者乃筌蹄而已所謂多聞則守之以約多見則守之以
卓也如求之不博畜之不多則未有於言也能知其要
未有於德也能知其奧所謂寡聞則無約寡見則無卓

也子貢稱孔子之與子識其遠者大者則於言也能知其
要於德也能知其奧然後能當於孔子之所謂學也審
能是則存於心者有以為主於內天下之事雖其變無
窮而吾所以待之者其應無方古之大有為於天下者
未有不出於此也堯舜湯武所以為盛德之至孔子所
以從心而不踰矩或得其行者未得其所以行得其言
者未得其所以言孟子之所謂聖而不可知之謂神在
是而已矣陛下萬幾之餘日引天下之士推原道德而
講明其意陳六藝載籍之文而細繹其說博考深思無
有解倦其折衷是非獨見之明老師宿儒所不能到此
臣之所聞也有不世出之姿與君人之大德又有出於

數千載之大志特起於三代之後此臣之所知也則陛下之學已可謂至矣然臣區區敢誦經之陳言以進於左右者誠將順陛下之聖志采傳說始終典學之言觀孔子少長進學之漸以陛下之明智知言之要知德之奧皆陛下之所素畜誠以陛下之樂道而繼之以不倦以陛下之稽古而加之以不已使天性之睿智所造者益深所積者益厚日日新又日新其於自得之者非徒足以待萬事無窮之變而應之以無方天下之人必將得陛下之行者不得其所以行得陛下之言者不得其所以言堯舜湯武所以為盛德之至孔子所以從心而不踰矩孟子所謂聖而不可知之謂神不在於陛下而

孰在哉繇是歛五福之慶以大賚庶民享萬年之休以求緩方夏德厚於天地名昭於日月惟聖意之所在而已臣愚不敏蒙恩賜對不敢毛舉蕞細之常務而於國家之體冒言其遠且大者此臣所以愛君區區之分也伏惟留神省察